

四庫全書

史部

欽定四庫全書

史部

福建通志卷三十二

詳校官監察御史臣陳化龍

檢討臣德生覆勘

總校官檢討臣何思鈞

校對官中書臣高 中

謄錄監生臣李傳燮

欽定四庫全書

福建通志卷三十二

名宦

四

邵武府

唐

廖懋 劔川人為昭武鎮將卒於官宋乾道中見靈珥災郡人祠祀之

五代

鄒勇夫 光州固始人王審知時為僕射出為歸化鎮將今泰寧縣治也時榛蕪亘野烟火僅百家勇夫

招集流亡葺理宅舍民爭襁負而至五代干戈相尋  
泰寧獨不被兵人物蕃阜田野墾闢皆勇夫之力子

相因  
家馬

宋

張度

太平興國中知邵武  
軍首創軍治有政績

陳從易

字簡夫晉江人端拱間進士知邵武軍  
政務德化召修冊府元龜詳泉州人物

石中立

字表臣洛陽人淳化間出知邵  
武軍後拜叅知政事卒謚文定

張仕遜

字順之光化軍人淳化中進士知邵武縣以慈  
愛得民嘗於聽訟之所手植海棠因以名亭邑

人封植之累遷同中書門下平章  
事卒謚文懿民立大乾廟祀之

蘇為大中祥符間知邵武軍政尚清簡在郡有詩為人傳誦後守袁轅讀其詩因題曰手掬樵溪塵可濯

恨無雄筆  
繼蘇為

曹修睦建安人大中祥符進士天聖初知邵武軍有善政始建郡學杜衍薦為侍御史

滕宗諒字子京河南人與范仲淹同舉進士仲淹數稱其才天聖間知邵武軍官至天章閣待制所蒞

官輒建學校有諫疏二十餘篇

吳師服字夢得甌寧人天聖間進士知邵武軍邵武產金品最下朝廷欲罪主藏者師復力爭之坐調

去後以職方郎中致仕

蔡充南城人進士天聖間邵武縣尉臨事以慎靜為主人以廉節稱之

田京

字簡之鹿邑人進士天聖間以廬州通判徙知邵武軍會妖賊王則據恩州京絕城撫士卒督攻之

賊繫京妻子登城逼使呼曰毋急攻將屠我矣京益叱軍前進注矢仰射其家四人賊知京無所顧乃去

尹洙

河南人康定中知光澤縣嘗以古學勵士文體一變為治尤有績

上官拯

邵武人進士至和間建寧縣丞聽訟明敏奸黠無所肆其巧

呂贊

藍田人大防父也嘉祐間知泰寧縣治尚簡靜不事煩苛

李山甫

南城人嘉祐中知建寧縣遷建學校擇士充弟子員督課之儒風以振

袁轍

字容直鄆人元豐間知邵武軍嘗條鹽法利弊奏減其課郡人祀之嘗有詩云滄浪不須濯纓上本

無塵其清介可想云

上官均

邵武人元豐間進士以論蔡確奸邪謫知光澤縣時有巫托神為人禍福均焚其像杖巫出諸

境

徐壽

字君朋建安人元祐間知泰寧縣會改鹽法計口數鹽民甚苦之壽納袍笏不肯從令民德之

章公弼

餘干人紹聖初進士投建寧主簿聞劉摯純仁等被廢托疾不起尋丁母憂廬墓三年宣和

間為禮部侍郎

黃琮

字子方莆田人元符間進士知泰寧縣廉訪使楊安時數干以私不答時聞令以治行稱者黃琮陳

麟翁谷號三循吏而琮為之冠

林豫

字順之仙遊人熙寧進士大觀中知邵武軍凡涖七郡皆有遺愛民肖像祀之

謝潛

字致虛長汀人進士崇寧中以瀛州教授上封事規切時事坐元祐黨尋赦知建寧縣毀淫祠禁民

問溺子邑人生子多以謝名

吳遠

字公路崇安人進士宣和間以獲海寇功改秩知泰寧縣縣素產茶舊引額過重民苦之遠力為申

請特蠲其半

章元振

字時舉崇安人進士建炎初知泰寧縣時隣寇四起乃據險立砦置帑庾其中率民兵堅守境

內晏然元振舊與秦檜同年坐不通書久不改秩後以治行遷朝議大夫

吳必明

字若愚崇安人建炎間判汀州葉儂范汝為竊發竭貲集兵防護徐清倡亂出牛酒招撫協謀

勦捕事聞壘書褒異除知邵武軍



**宋**

字材成莆田人政和中進士紹興初知邵武縣隣寇范汝為等就撫所過需丁壯負擔小拂意即屠

割啖食之棐先寇至令空邑遁去寇竟持兵謀入卧内棐徐起諭遣之不為調一夫民得全活後三十年

龔茂良為郡法曹見邑民語及棐有涕下者

**王**

字元渤楚州人紹興間知邵武縣民俗生子多不舉奏立舉子倉凡貧當產者給以錢米有袁氏夫

且死詣庭投牒丐他適洋見哀經之下紅裳微露無戚容械訊之乃毒死其夫者問如律

**吳**

播延平人紹興間知建寧縣謹厚有吏才飾以文學省科役鋤强暴邑民德之

**趙**

子木紹興間知邵武軍剛介有政聲與延平守上官惜建安守魏缸俱以剛介著人號為鐵鑄脚三

史判

黃維之

字叔張永春人紹興中進士進所撰太祖政要除大理丞廷尉欲奏獄空維之抗不書名求補

外差知邵武軍陞辭賜對論內侍不得干預朝政後綰邵章持使節出入監寺畧無阿曲

黃唐佑

江夏人紹興間知建寧縣時當兵亂拊循鎮定民賴安堵嘗創建廟學以興文教

王以詠

字永吉安人紹興間進士以岳飛等薦擢知光澤縣嘗曰治公家如私家自符天理惜官物

如已物乃合人情  
終任未嘗妄費

李恂

字顧言龍溪人紹興間進士知邵武軍除宮觀致仕初恂登第與史浩同甲浩當軸累召不起士論

之高

林宗顯

字孝揚長樂人紹興二十七年進士乾道間知建寧縣聽訟精明庭無留牘為民興利除害民

立祠於東  
山祀之

江默 字德功 崇安人 乾道間進士 知建寧縣 多忠蹟 民像而祀之 嘗從朱熹遊 熹歎其無他嗜好 一意詩

書稱為篤  
實君子

謝源 字資深 臨川人 淳熙間任邵武縣丞 喜愠不形 民以不擾當路 多知其賢 常平使者宋若水尤器重

之 朱熹謂一見即知其為長者 又稱其句律之妙 可追前輩 歿為銘其墓

李宗之 莆田人 紹熙間進士 通判邵武 軍有文名 諸史百家口答疑問 人以書尉目之

陳元平 字熙初 臨川人 紹熙間知邵武縣 熟於民情 諳練軍政 雖老吏宿將 不能難之 尤尚儒術 為黃

幹所  
推許

陳孔碩

字膚仲候官人紹熙中知邵武縣聰明慈愛有古良吏風

張訢

毘陵人紹熙間知光澤縣嘗於境內做社倉之法以濟里民之無蓋藏者及中下之家生子不舉者

又附倉列屋以待行旅疾病無所歸之人法甚精善朱熹為之記

劉彛

字執中懷安人進士為邵武縣尉嘗作陂塘教民種藝凡可惠民者知無不為

陳雲

崇安人開禧間進士建寧縣主簿時峒寇李元勳竊發多方撫禦邑賴以安

徐範

字彛父候官人嘉定間進士初範與同舍生叩闕上書極論韓侂胄逐趙汝愚事編管禁錮十餘年

侂胄誅還國子主簿入對言多事之秋宜一意養民以培國本言極痛切除知邵武軍以懋績著

趙時館

宋宗室居崇安慶元中知泰寧縣撫治有方晉階朝奉大夫知邵武軍

張冕

嘉泰中知邵武軍時金人遣使約降附冕立斬之人壯其勇

葉介

字方叔武義人淳熙八年進士嘉定中判邵武軍時泉州海寇猖獗郡適缺守尚書黃公度帥閩委

以郡事介召軍將授方畧擒滅之  
著有中庸講義並江雜稿十卷

陳彭壽

天台人嘉定中知邵武軍廉介明勁鋤擊橫暴惠愛百姓郡人祠之大乾廟右廡

趙時通

字宜伯宋宗室慶元進士嘉定間知邵武軍始至官諭民毋縱酒尚氣毋挾兵力有殺人不覺

察既殺不亟捕者皆坐之廣學田設藥局立濟貧庫時復簡兵閱士諸政畢舉及卒真德秀銘其墓有曰

天府片言而解繫者百數  
漁川三月而懷恩者千家

陳燧

字孟明長溪人嘉定間進士剛直敢言權奸忌之以宗正寺丞出知邵武軍

林孝聞

字質文福清人進士嘉定中知建寧縣為政廉明尤工於文嘗捐俸置田以充學宮號林公莊

包恢

字宏父建昌人嘉定中進士任光澤縣主簿嘗平寇亂豪猾姦利一切剪除政聲赫然

劉純

字君錫建陽人紹定中晏頭陀聚寇汀邵純募士討平之調知邵武縣建寧下罹寇起提兵親搃賊

巢死之詳  
建寧人物

王遂

字去非金壇人嘉泰中進士紹定間知邵武軍寧化賊破建泰二邑勢且及邵遂蒞任道出江山浦

城遇避地之人即遺金使為歸資從者如市時邵已失守遂露居野次撫摩瘡疾勒兵轉戰誅筋竹峒巨

寇餘醜悉降民以安堵後歷知泉建二州仕終工部尚書

趙以夫

字用文宋宗室嘉定進士紹定間知邵武軍時下罹賊猶據險慨然以平賊為己任清溪峒寇

再造府治詳  
福州人物

王埜

字子文金華人嘉定進士紹定間知邵武軍時盜起唐石埜親勒兵直擣其穴平之民賴以安

陳韡

候官人進士紹定間知南劍州提舉汀州邵武軍嘗進攻五賊營若破潭瓦際賊尋往邵武督捕餘

寇賊首晏彪迎降韡以其力  
屈乃降誅之詳福州人物

胡斌

湖州人紹定間以殿前司戍邵武會江寇大至郡無城壘斌奮身迎戰大呼曰我以死救百姓兵盡

矢竭猶率殘卒巷戰手揮雙刀殪賊無算刀折易兩鐵鞭至逆塘賊從後刺之兩鞭猶在手屍立數日不

仆事聞贈  
武節大夫

趙紡夫

宋宗室居福州中法科初為建寧縣尉紹定間辟知本邑時筋竹洞為賊巢穴紡夫單車入境

撫循制馭繼合諸路兵掃蕩賊巢  
元惡授首邑境肅清陞判本軍

謝公旦

臨川人紹定間建寧縣丞安靜不擾  
時稱良佐郡守趙以夫辟為幕僚

余炳

紹興人紹定間為建寧縣尉時汀寇壅境令佐皆  
遁炳獨率士卒首挫賊鋒以待王師後以功進知

秦寧  
縣事

李丑父

字良翁莆田人端平間進士調邵武軍司戶  
參軍有治績歷提舉湖南常平詳興化人物

周居權

淳祐間知秦寧縣邑有不舉子  
者居權為文勸戒民感而從之

王邁

字實之仙遊人嘉定進士淳祐中知邵武軍時尤  
早求言邁驛奏七事以徹龍翔宮立濟王後為先

務嚴飢作歌勸糶富室  
荒為出粟米價條平



廖邦傑

字懷英順昌人淳祐間知建寧縣修學宮增廩

養殘疾治藥餌作糜粥所全活甚衆咸淳間參攝軍事修圖經增置郡學養士田

林玥

字自明福清人淳祐間知建寧縣政事精明吏不能欺不科斂橫費以戕民

洪天驥

字逸仲晉江人淳祐間進士任建寧縣尉海盜王若曾嘯聚千餘騷動郡邑諸所委捕多畏沮

天驥直搗賊巢一舉平之邑有三大奸黨相率就縛有爭訟者諭以禍福皆解散去

林潮孫

閩縣人嘉熙進士寶祐間知建寧縣治事精明深達民隱舉行鄉飲酒禮以正風俗

洪振龍

候官人建寧縣尉剛明難犯時有寃獄令欲文致之振龍毅然以為不可竟直其獄嘗請寬鹽

政雖觸時忌不顧所至屏絕饋遺人稱其清

劉克遜

字無兢蒲田人以救荒捕盜功遷知邵武軍有善政先是錢價平每丁賦錢五百後價貴至四

倍下檄蠲之曰以此得罪無恨也閩郡感德

黃師雍

字子敬閩清人寶慶間進士史嵩之惡其不附已出知興化軍改邵武靜厚寡德擊邪翼正侃

侃不少阿詳福州人物

李伯玉

字純甫餘干人端平間進士彈劾不避權貴出知邵武軍後又忤賈似道丐歸

方澄孫

字蒙仲莆田人淳祐間進士邵武軍教授景定間知本軍綏柔獷俗嘗著女教一書以勵閭閻

詳興化人物

宋秉孫

字葵父建陽人淳祐進士景定間知建寧縣值歲飢悉力賑給邑舊無城垣乃度地興築不期

年而成後倅本郡又撥  
餘鹽錢置田為繕修費

程夢桂

建安人咸淳中知建寧縣愛民  
重儒捐俸二千餘緡以新學校

趙良淳

餘千人汝愚曾孫任泰寧主簿恥事干謁浮沉  
元員咸淳末元兵至衆潰良淳奮筆書几曰寧  
為宋朝鬼不作北  
廷臣遂投繯而死

趙時賞

字宗白宋宗室居太平州咸淳中進士景炎初  
判邵武軍議論慷慨善謀畫文天祥開府南劍

奏辟參議軍事數以偏師當一而空坑之敗天祥適  
去獨其妻及二男二女見執時賞坐肩輿追騎至見  
其風姿俊偉問之誰給之曰我姓文騎以為天祥執  
見帥帥問之答如初後有俘者識之曰此趙通判耳  
自是天祥去益遠時賞至  
隆興罵不絕口遂遇害

元

廉忱

延祐間邵武路總管崇學校增飾從祀像綽有政聲

况達

字肩吾廬江人泰定間光澤縣尹下車日豪強斂跡時延見諸生講學不倦瓶雲岩書院以崇文教

有兄弟爭田者達曰視若貌非不恭不友人也投以伐木之詩親為諷咏解說兄弟皆感泣求解

王應祚

字舜卿清源人至順間知邵武縣廉直有才嘗述陳襄令仙居時條教以導民士民戴之

庫楚

維揚人至正中知邵武僉樸寡慾僚屬化之時汀寇犯境極力保捍郡賴以安

吳阿勤坦布哈

三華人至正間監郡時建寧盜應必達宜黃盜涂一涂祐新城盜童遠等陷建寧遂

乘虛竊據邵武阿勤坦布哈募兵三千進討殲賊於順昌又率弟姪分兵從下流編筏由南岸濟自與副帥

從富屯驛奪艘以渡與南岸合破賊於水口未幾賊  
衆復合親自策馬橫矛身先士卒進擊於陔嶺追斬  
殆盡賊定議者謂城汚於賊當悉焚棄乃  
惻然曰民為賊脅耳豈得已哉置不問

劉泰亨

至正間任邵武推官時汀寇嘯聚賑濟撫集募義民為捍禦計境內晏然

郭瑛

至正間任邵武經歷嘗於城西置惠老慈濟堂以居窮民之無告者復買田贍之又買山水北為義

塚

耶律惟一

字用中許衡高弟也至正間任邵武縣達魯噶齊興學獎士後以其學敷教成均

阿勒達爾圖

字彥安蒙古扎拉台人至正間知邵武縣性凝重處公事如家事視僚友若昆季

孔公俊

字師道曲阜人至聖五十三代孫至正中知邵武縣時邑新被寇公俊存恤勞來嘗曰逆節

之萌山教養之無法也乃輕徭薄賦重惜民力大修學宮不勞民不斂衆功以告成

張祥

字彥禎真定人至正間進士知邵武縣時當積弊之餘與監邑阿勒達爾圖均平徭役民甚便之

傅士謙

臨川人至正間知邵武縣時兵革甫定士謙極意撫綏以興學化民為務流竄相率來歸邑有

新居公  
無述賦

蕭寅

字克欽吉州人元末為邵武路同知時陳有定用法嚴峻寅佐之以仁恕全活甚衆會行兵擊賊入

山谷間猝遇賊被圍數重忽兩人躍馬持戈前來大呼曰吾父蕭公也相與羅拜而去道經建寧光澤二邑有七人執兵而前跪曰公生我敢以百金獻寅慰諭而却之

明

周時中

江左人洪武初知邵武府時承元季兵革之餘民多流離時中拊循安集百貨蕃息

陳撝

金谿人洪武初知泰寧縣時值兵亂撝披荆棘集流亡興學勸農不暮年而百廢以舉

程煝

樂平人洪武初邵武府教授撤三皇廟材建大成殿請府前鋪址建明倫堂購民地為先賢祠

定

姓無考字伯安高昌人洪武間知泰寧縣尚行實敦風化作士氣訪民疾苦凡公署學校倉庫多所

營建循行阡陌親為課農力去軍屯之設遷廣德同知後致仕歸過泰寧父老遮留因家焉

夏祥鳳

嘉興人洪武中知邵武縣嘗曰廉為士之大節居官而不能廉大節虧矣雖有政事何足道哉

及代去宦  
索蕭然

張淵

華亭人永樂初知泰寧縣邑自元季以來學宮廢弛淵銳意作興多所成就有訟於庭者必從容開

欽定四庫全書

福建通志

十一

諭之使  
自悟焉

林興祖

字伯禎湖州人永樂間舉人授邵武府常豐倉大使時郡中歲飢興祖慨然詣巡撫夏原吉泣

陳氏命危急義形於色  
檄郡發廩全活數萬衆

鄒良

樂安人宣德中知邵武縣性鯁介不避權貴有惠政秩滿邑人攀留之進秩仍署縣事

楊衡

岢嵐州人正統間知邵武府沙寇鄧茂七倡亂奄至城南陔嶺衡選民兵協武臣勒兵進討遠近避

賊來附者啟鑰納之時大軍道經邵武  
需索甚峻衡以正詞拒之郡境晏然

汪榮

歙縣人正統間知建寧縣時當沙寇殘燬民有從賊者多方撫諭悉復其業

傅恭

分宜人正統中建寧縣主簿時沙寇鄧茂七犯境民多脅從令丞皆遁恭挺身率民保障又以大



義反覆開諭民  
始無從亂者

黃瑞

徽州人正統中泰寧主簿時沙寇為亂瑞率民據險止若堅守勸富民出粟以賑民飢闔境始安

李春

鳳陽人正統間郟武府檢校時沙寇為亂突至城南春率民兵出戰親冒矢石為士卒先連射皆中

賊驚却去累有  
提兵討賊功

王義

字大節臨川人成化間泰寧縣訓導嘗日正衣冠坐齋堂隨諸生材質高下授學講經反覆要義懇

惓然欲其身體力  
行士皆幡然向學

王拯

東莞人成化間知郟武縣公廉愛民嘗公事出郊民具雞黍拯止茹蔬尤慎興作時縣廳敝壞為節

縮廩稍銖積三百餘兩分封寄兩者民家曰儲此俟歲豐新之尋以憂歸拯後作書白郟守召至封識如

初歎曰有賢  
史始有良民

盛顛

字時望無錫人成化間以劾石亨改知邵武府釐

奸剔弊先是郡有豪黨朋害善良顛廉其尤者尸  
諸市又以徃役舊從里胥推舉編充奸弊百出乃為  
通和一縣丁田編為十甲週廻以應至驛傳舊聽本  
驛科派糧戶支應胥吏並緣為奸顛因糧起科貯於  
官隨事給直郡鮮科目延旁郡名儒以教諸生後遂

有登  
科者

馮孜

字師虞南充人天順中進士成化間知邵武府民

有構訟者兩造具備一訊而決嘗自誦曰因固空  
虛心自安慎徵輸平徭役專以恤民為務會建陽賊  
官稱生嘯聚為亂郡與賊隣恐貽患遂募近民為鄉  
導發兵直抵其穴  
生擒賊帥平之

劉元

字仁甫仁壽人天順進士成化中知邵武府嚴正不煩賦役訟獄吏胥無敢售其奸時福州所隸白

沙諸驛供需不給議劄郡賦以益之元以郡山多田少民力不堪懇切力請遂寢其事每政暇與諸生講

貫疑義士風自是振起

潘洪

宿遷人成化間進士知紹武府質直無矯飾有御史呂炯徧歷列郡携所親三人交通納賄洪廉得

其狀捕置之獄檢其贓物并得其行賄者名聞之上官以俟處分炯罷去

王佐

字汝學臨高人師事邱濬弱冠登正統丁卯鄉薦成化中授邵武府同知廉靜不阿屬秦寧盜發佐

往招諭降其脅從者數十人餘賊散去

廖鐸

宜黃人成化間邵武府推官廉謹有幹濟先是郡之理刑者隨事決遣不立案牘健訟者乘機罔上

展轉論訴紛紛不已鐸至事無巨細悉依律擬案成  
山立刁橫者無所售其技嘗造版籍備賑濟井井有  
法部使者  
稱其能

何昌言

建德人成化間知光澤縣居官清  
慎嘗創建儒學舍宇及預備新倉

劉俊

字君佐深州人成化間進士由監察御史左遷知  
光澤縣以戢奸植良為首務毀淫祠禁師巫凡境  
內庵院之私創者悉令撤  
其材植以葺學宮壇壝

夏英

字育才江西德化人弘治間進士知邵武府嘗躬  
巡阡陌勸民力田孝弟以文學飾政治凡公署學

校水利橋梁  
一一修舉

陸勉

字懋昭江陰人弘治間由舉人歷邵武同知以清  
謹開時徑役失平勉造平定冊哀多益寡以均勻

之編為定役民甚稱便有泣苗詩教民  
文勸吏圖傳於郡擢南京刑部郎中

王儼

字子敬江都人進士弘治間知光澤縣公平廉謹  
喜造就人材當事考最曰學行俱優政教兼舉擢

南京工部主事

馬昇

河源人進士弘治間知建寧縣  
綽有政聲經畫築城民尤賴之

鄭鑿

緡雲人弘治間任邵武縣丞臨政毅然不可干以  
私值大造黃冊力除飛詭諸弊以三則編徭役民

賴均

姜桂

安仁人進士弘治末知邵  
武縣慈祥公正不露圭角

楊脩

無錫人正德間舉人知建寧縣時  
遭寇亂修撫集流離民復舊業

戴昂

番禺人舉人正德間知泰寧縣時徭役視他邑較重力請蠲豁段淫祠清獄訟尤加意學校以崇文教

教

鄒武

字靖之常熟人正德間由舉人同知邵武府事時上司臨郡清軍官責里長倉皇失措多捏同姓詭

名以足軍額及物丁起解則皆空名武力請除豁以去就爭之又為條約以示民皆切政體

張羽

字鳳舉泰興人正德間以御史知邵武府興學勸士嘗復射圃毀淫祠改造書院修築溪壩新葺

文廟禮罷時軍卒弗靖以威德鎮之每朔望視學懲逸獎勤講論不倦尋擢河南憲副

李成

建平人正德間知泰寧縣時大帽山寇擾建寧成嚴防衛以備捍禦李福英統兵討賊所過多剽掠

惟泰寧賴成調劑無一卒敢越利涉橋為害者

丘民範

字汝中貴溪人進士嘉靖間知邵武府時郡政弛豪族縱橫民範糾之以猛有蕭令不飭黜以

懲貪先是驛傳侵漁糧戶為民害民範為計糧薄征按月給發以所羨餘貯庫奏請補河舶魚糧歷歲賠累之苦郡人稱其仁而不懦明而不察

王鈞

奉化人嘉靖間知邵武府抵郡僅一蒼頭自隨時有內瑞道經邵武前途索供甚苦鈞知將至遣官

往諭之曰太守止飲熱川水耳不得為境內累瑞斂戢而過

邵德久

餘姚人舉人嘉靖間知邵武府革里甲橫征節庫役冗費值流寇攻城為集義兵躬親捍禦嘗

築光澤泰寧二縣城不擾於民民德之

英國倫

字明卿興國州人進士知邵武府時香寮賊逼郡國倫勒兵備之賊不敢犯仕終河南左叅政

國倫與李攀龍王世貞徐中行宗臣梁有譽謝榛有七才子之目時宗臣徐中行先後宦閩人以為一方星聚云

凌瀚

蘭谿人舉人嘉靖間泰寧教諭嘗捐俸給諸生供費與貧乏不能婚葬者直義不阿時以正己率人

育賢報國自勵

吳預

東莞人舉人嘉靖間邵武府推官明斷不阿訟獄清理尋署邵武縣事釐弊節財經年里長有未識

者面

曾忬

字汝誠泰和人嘉靖間進士知光澤縣嘗新泮宮建弘濟橋

吳國器

崇義人嘉靖間知光澤縣邑舊無城會山寇竊發國器申請立城殫力完築邑賴保障



張彥聖

餘千人嘉靖間泰寧縣主簿以  
禦寇遇害民哀之為立祠以祀

周衝

字道通宜興人嘉靖間舉人任邵武府教授與  
諸生講明性理之學舉行冠射二禮舊俗一變

鄭時舉

新會人舉人嘉靖間知泰寧縣以清儉聞先是  
令丞簿耐薪水悉屬民供歲不下千五百金民

困於奔命時舉悉  
罷之以安民生

江一桂

婺源人嘉靖間舉人知建寧縣愷悌嚴明吏  
民畏服嘗購地建東山書院置田以贍諸生

陳學乾

揭陽人舉人嘉靖間知泰寧縣清  
勤淬礪歸檢筭篋止圖書而已

潘日新

新昌人嘉靖間邵武縣學教諭少從王守仁  
遊勸學造士常以身先之所著有人倫四箴

許縉

臨清人嘉靖間建寧縣巡檢慷慨有膽力時汀寇  
侵掠夜半聞警進追之至境外塘坊寇伏猝發從

兵四遁繕陷潭中死焉  
民義而哀之立祠以祀

熊鶚

南昌人嘉靖間舉人知泰寧縣不事煩苛紳  
有幹才建縣城靖民有功民立報功祠祀之

何孟倫

新會人嘉靖間進士以不避權勢改知建寧縣  
守正不阿扁其堂曰節愛凡有利於疆圉士民

者一一具舉  
時稱賢令云

吳金

豐城人舉人嘉靖間知建寧縣時潮汀寇盜蠹起  
金閉練義勇固守疆圉次年春賊黨益衆遂率義

勇大戰境外秋又合義勇鄉兵奮力出勦十月賊復  
從南豐入乃大立賞格調集各保戰於池下三坑入

戰於陳樓三溪斬獲甚衆奪回  
被擄男女數百人邑倚為干城

陳激衷

南海人舉人嘉靖間建寧縣學教諭每朔望率  
諸生習冠射燕射二禮巡按鼎豹聘為五經書

院長生平行視言笑皆不苟尤精於樂律

鄭宣化

應天人嘉靖進士萬厯間知邵武府勒潔已愛人四大字於川堂又刻清得門如水貧惟帶有

金聯以自警罷一切冗役凡可惠民者悉心為之卒之日民為罷市建祠以祀表曰清真

蔣輝

全州人舉人萬厯間任邵武府同知涖政得大體時議丈量輝曰寸土悉屬版圖必欲火田官吏所

過雞犬皆驚本為哀益反滋混擾民心惶惑莫知所出有仁心者能無動念耶議遂止又嘗捕盜於澗城築杉津壩於秦邑所在多著德政以擢去士民構亭並石以紀之

司馬祉

會稽人萬厯間進士知邵武府政先文教以不欺訓士以家範訓俗時有虎噬人祉為文告神

虎立

鍾萬春

清遠人舉人萬歷間任邵武府同知  
精敏有吏才監弊奸數恣心清革

孫成泰

平湖人萬歷間進士知邵武府衙署肅清官屬  
畏憚首崇文教以示造就值大飢先賑後請全

活甚眾以調去士  
民赴京保留之

閻士選

江都人萬歷間進士知邵武府有忠政留心學  
校親製學庸解以誨諸生又建復黉宮工舉而

民不  
擾

嚴激

字道激常熟人萬歷間知邵武府時有馬縣尉為  
民蠹激廷褫之暇則進諸生講明體適用之學

濮應瑞

華亭人萬歷間任邵武府知官執法不撓時有  
僑寓勢宦欲營官地自肥者瑞厲色却之後卒

於官囊無餘俸士民迎入  
清真祠以配郡守鄭宣化

萬尚烈

新建人萬厯間舉人任邵武府同知禁賭戡盜奸弊肅清嘗捐俸建東塔東橋修學宮士民頌

之

王應昌

嵯縣人萬厯間知邵武縣敦尚風節凡為民害者一切罷去政績爛然

商周祚

會稽人進士萬厯間知邵武縣均里役寬徭賦懲蠹吏決疑獄摘發如神時縣治火災倉皇間

犴狴無越者曰寧死於火不忍負令君也

林樹薰

湖陽人萬厯間知光澤縣學田舊鬻充費樹薰與諸生謀久速計適上司以奸民傳尚謀買寺

田事歸縣審結因廉其實遂請以田贖學邑士受賜

錢吾德

嘉善人舉人萬厯間知泰寧縣有聲詞場加意庠序士民立祠橋南祀之

郭有春

南昌人舉人萬歷間知建寧縣以忤當道去卿  
愚者瞋以百金有春嘆曰吾生平不如輩何以

一箇汗我却之  
衆為立遺愛亭

周之基

湘潭人萬歷間進士知邵武府敏達善斷率  
屬嚴肅忠愛士民死之日諸生持祠祀之

陶人葺

深陽人萬歷間進士知邵武府嘗帶理糧務捐  
耗米以修葺學宮葺濠租築橋壩以疾卒於官

韓國藩

鷹揚衛人萬歷間進士知邵武府明敏有幹才  
剛斷如流未嘗輕入人罪門絕干謁令居民藩

潞水以制火患革南  
濠租稅以杜奸民

朱復儀

海寧人萬歷間任邵武府推官清獎鋤奸摘發  
如神嘗捐俸建尊經閣進諸生談理論文去之

日立祠  
以祀

楊春茂

南昌人萬厯間進士任邵武府推官折獄多所平反作興賞序約杉關津稅豁濠租魁驛困卓

然循吏

程寰

字仲輔歙縣人萬厯間進士知光澤縣甫下車見民椎魯為立義學課文民鮮蓋藏又築義倉備賑

教養兼舉

汪正誼

安居人舉人萬厯間知光澤縣建學宮新書院毅然有為百廢具舉

宋九儀

萬載人萬厯間知建寧縣時盜賊充斥多方捕治民始帖席俗又感於巫覡九儀毀其像梏其

人併禁紛華諸惡習以示民朴

華士崧

烏程人萬厯間進士知建寧縣英斷嚴明鋤暴惡禁賭博徵收有法一時豪獷垂首

項應瑞 遂昌人舉人萬厯間知建寧縣政務寬簡與民  
休息嘗自謂吾服官無他長惟大事能使之小

小事能使  
之無而已

王逢元 睢州人進士天啓間知邵武府優禮士類崇尚  
文教凡義倉水利一一修舉調去士民遮道攀

留所著有四書  
正解行於世

王道焜 仁和人舉人崇禎間知光澤縣嘗舉袁  
黃所云官開私竇如女失節語以明志

金邦柱 蘇州人崇禎間知邵武縣居官清慎水利津  
梁多所建役值歲飢捐俸煮粥日活千人

朱士景 吉安人崇禎間邵武府推官先是郡糧歲僉富  
民充斗級責一切支應諸費每至破家士景釐

樊上蒲陋  
規盡萃



左光先

桐城人舉人崇禎間知建寧縣時盜賊充斥光先廉得逃藪者名併關通捕卒狀捕殺二百餘

人盜賊并息市猾不法者亦以次按治

鄒守常

豐城人進士崇禎間知泰寧縣清賦役鋤衙壺有惠泰良規闔邑刊傳

國朝

陳詰

順天人順治三年知邵武府廉正有守當鼎革初協和文武多方招徠訟獄平反悲愜人情有全

城功郡人之德

趙之璉

洛陽人順治三年隨征入閩授邵武縣會山寇起與江右叛帥結為聲援衆且數萬屢薄城下

時駐防兵少外援不至之璉簡閱丁壯得有勇藝者二千餘人部署如兵法遂親冒矢石大呼擊賊所向

披靡後卒於官郡中  
無老幼咸為墮淚

池鳳鳴

遼東人順治三年任副總兵四鄉寇亂連歲興  
師鳳鳴文武相協善馭驕將能得其死力大有

驅除  
難功

王之綱

北直人順治七年任延建邵汀左路總兵會鄧  
地寇警提兵來鎮駐分守道衙門軍屯西北城

內紀律森嚴兵有擅取民間一蔬者立置之法素善  
書畫喜與文士交有輕裘緩帶之致及返士民焚祝  
送之

何棟

崇明人順治七年任邵武府推官精敏有為先是  
郡縣每歲輸糧赴省責之里民胥吏因緣為奸富

民賄脫者金以百計力不能者應役上下需索有需  
曰產妻孥以償者棟惻然力請上司以糧貯公帑官

收史解著為  
例民大蘇息

張承恩

北直人順治八年任副總兵善騎射每臨陣必先登時會勦土寇官進才運籌設伏不旬日而

降之治兵嚴肅有踐踏田畝與恃  
強質買者聽擊鼓轅門以達民情

溫光涵

清源人順治九年知建寧縣時海上用兵軍需孔急督府羽檄叠至光涵均平賦役設法供應

以憊殘黎四郊  
安堵後卒於官

周鼎重

古田人順治十五年任邵武縣學訓導時學宮傾圮鼎重力肩其任大興工作不數月殿門廊

廡悉成鉅觀人  
頌為師範第一

王秉直

南鄭人順治五年以進士知泰寧縣常戎馬交馳之日軍儲所發調度有方上不乏供而民不

困屈人服其才

王譽命

號鶴溪上元人順治八年以恩貢知泰寧縣精勤有幹濟邑當兵燹後學宮公署悉被焚燬譽

命捐作修葺又繕治城垣樓櫓時團練鄉勇以防寇警撤駐劄防兵之擾邑賴安堵

徐登第

遼東人順治間署建寧縣駐防守備計擒土寇黃黑黃湊連蔥等殺之寇焰遂熄調鎮海澄兵

威益肅海寇不敢犯境全閩咸倚重焉

龔廷擢

南鄭人康熙二年任邵武府推官秉正嫉邪嚴飭四邑衙蠹殃民一時狐鼠屏息後卒於官士

民哀之

王鋤

湖廣人康熙二年任邵武副總兵值東路上寇李桂孫聚亂鋤大張筵宴令部將誘降尋皆就擒東

路以平士民踴躍為建亭  
錫碑紀功於東橋之左

李化龍

字躍禹陝西榆林人康熙三年以從征黔蜀有功進秩遊擊防守建寧縣先是庚子之變兵民

疑忌未釋化龍至多方撫戢嘗延紳士詢民間疾苦有古儒將風會江右寇入蟠湖隘甫聞警傳令出師寇夜遁去遂從問道疾趨至嚴塘望見賊旗飄颺樹杪時當日午書記范學仁固請暫駐營炊化龍不可曰兵貴神速民間被俘婦女苟需晷刻身汙名敗謂責任何疾提兵抵三溪出賊屯後單騎奮臂擊其中堅手刃數賊賊辟易遁俄而伏發化龍墜馬死立祠祀焉

張瑞午

廣寧人康熙十二年由廕生知邵武府潔已率屬禮士愛民十三年耿逆變亂陰與同知高舉

等謀討逆事泄被擒罵賊不屈死事聞贈太僕寺卿廕一子時江西建昌府知府高天爵以與謀同日遇

害

高舉

奉天人康熙九年由筆帖式任邵武府同知佐郡廉明持躬謙肅苞苴請托皆不行狀逆反舉與郡

守張瑞午協謀討逆事泄遇害贈福  
建按察司副使與張同祀九忠祠

柳文標

江西德化人副榜貢監康熙九年以邵武府通判攝建寧縣事時邑經兵燹民德特甚文標開

誠撫字痛革積弊數十條闔邑頌德十一年復  
攝本縣事忠政如初民為建祠勒石於東城

柯永新

號烜菴奉天襄平人康熙十二年以舉人知光澤縣初至官聞邑有豪猾董子亮等謀為不軌

潛引江右寇徐仲常周正所入境將大舉為亂四境  
惶惑永新親詣府鎮請兵密設奇計直搗其穴擒之  
賊黨解散甲寅耿逆變起  
北向慟哭憂慙不食死

王興禹

奉天廣寧衛人康熙十五年由金華府同知隨大帥入關十一月奉檄權知邵武府時偽帥

因大軍屢境焚燒剽掠城邑為墟興禹一意招集贖回被擄子女以千數驅逐強兵悍卒盤踞民居者諸所殺發不事追呼胥吏作奸必置之法尤崇尚學校每朔望於瓦礫中止箬蓬瞻拜集紳衿以圖創復攝篆甫期月大綱小紀犁然皆可遵守

金鳴鳳

號竹亭奉天東寧衛人康熙十六年以恩監知光澤縣邑值耿逆初平村落殘燬鳴鳳極意招

徠嘗單騎巡行郊野有強卒凌虐百姓則曲諭而重創之一聞寇擾遂統領鄉勇盡力捕殺嘗施米以賑飢民捐貲以贖難婦給牛貸種恤農民之無資者邑民自是生息

王肅

上海人康熙十八年以太學生知秦寧縣邑惟水災民居飄蕩浮尸日以千計肅惻然為民請命踰

田畝歲額七百餘兩城郭橋梁衝決廢壞者括囊三千金締造完築會編審屆期數十年有戶無丁者盡予豁免貧民以蘇未幾卒於官士民爭崇祀焉

**張彭**

沁水人康熙二十四年知光澤縣邑屬通衢夫役最繁又值寇盜甫平瘡痍未起彭為力除積弊建置常平社倉以備不虞中豁鹽牙溢額餉銀併減浮引積累邑人戴德不忘

汀州府

隋

**穆肅**

江南人刺汀州政尚清明秩滿之京道經將樂溪聞唐受隋禪躍溪中死將樂人祀之

唐



林披

莆田人天寶中授臨汀郡曹掾郡多山鬼淫祠披著無鬼論以曉之刺史樊泂奏為臨汀令以治行

遺本郡別駕  
詳興化人物

陳劍

大厝間汀州刺史郡治舊在新羅再遷至東坊口劍始至聞鼓角聲堙鬱不暢適年凶民疫吏民進

狀請遷治劍擇地卧龍山之陽曰白石村請於朝改築焉

羊士諤

貞元初進士為宣歙巡官永貞二年以事至長安時王叔文用事諤言其非叔文怒欲誅之韋

執誼不可乃  
貶寧化尉

蔣防

字子輝南興人長慶中以元稹李紳薦為翰林院學士為李逢吉所忌出刺汀州

劉岐

大中初刺汀州築子城羅城修拓陳劍所遷壁壘郡稱雄鎮

鍾全慕

唐昭宗時為刺史王審知喜其  
驍勇有謀畧分汀州使之

五代

王繼業

父延宗為汀州刺史繼業復  
為守父子相繼俱有治績

王雲

後唐同光初任寧化縣徙黃連舊  
治於竹篠窩以當旺氣今仍其址

宋

王嗣宗

汾州人太平興國六年知汀州事太宗遣武德  
卒潛察遠方事有至汀者嗣宗械送京師因奏

陛下不委任賢俊狠信此輩為耳目太宗  
怒械嗣宗下吏削秩既而嘉之還其官

蕭律

字調元新喻人景德二年賜明法及第守  
汀州屬邑多嵐瘴律奏遷州治於平曠

方嶠

莆田人元豐間汀寇肆掠特除嶠知本州削平之

郭祥正

當塗人工詩元豐間判汀州有善政每與太守陳軒聯轡郊行多所題咏

蕭佐

江西人元祐中知汀州新庠序斥公田以供廩餼文風以盛

劉叙

元符元年授長汀丞會有旨瓶清流縣辟為令經始縣事營繕官舍屋井俱有條理

陳粹

閩縣人元符三年知州事勸農桑嚴溺女之禁崇寧間遷瓶學舍奏課居天下第三

汪天任

字莘老浮梁人大觀中進士知汀州事時方行王安石字說天任獨守六經不變所著有語益

新意

李光

上虞人靖康初以侍御史極論蔡攸朱勔謫監汀州酒稅

施禔

建陽人建炎間以門蔭擢知寧化葉儂叛虛聲欲取汀州禔率部民守隘叛卒不敢犯帥司檄巡尉

領弓級中途不進欲殺尉為亂禔撫定之後仍不悛禔乃取黥者三十人置之法自是肅然

丘登

歙縣人字明甫四領鄉薦登紹定二年進士授江西贛縣主簿再授汀州府教授多善行

鄭強

長樂人紹興二年知州事始至郡視廟學荒地慨然有更創意會有詔葺學官即日度地建於州東

又市腴田以增餼廩擇嚴師以定課程州人立祠於稽古閣下祀之

張昌

紹興間知汀州政尚寬和民不忍犯呼為張佛子

黃武

興中知汀州事齊述據賴城叛武增辟濬隍備器蒐乘西向討之述突圍去

陳吉老

仙遊人紹興間清流丞以最遷判州事賴寇犯境吉老自將破賊長子希造與賊胡保等遇於

武平入竿口深入無援死之吉老忍痛擊賊賊大潰  
凱旋郡將道迎慰問吉老笑曰馬革裹屍本男兒事  
何至作兒女悲涕耶事聞朝廷  
官其遺腹子光祖詳興化人物

劉師尹

字伯任長樂人紹興間為汀州錄事參軍時汀  
令陳夢遠誣郡士劉亮葉椿以死罪殺亮囚椿

郡倅向士俊黨夢遠傳致其獄師尹知其冤抗辨再  
三士俊怒督之益急師尹乃取狀書其尾曰吾寧去  
官不可陷人於非命毅然投劾去後帥司覈得實夢  
遠士俊錫秩椿等獲免邦人德師尹祀之官終奉議  
郎提舉浙  
東常平

趙公迥

字仲和晉江人紹興二十一年進士調汀州戶  
曹隆興初郡卒愆支賞稍緩羣譟門繫知錄

官將殺之公迥諭之曰貲與命孰重叛則爾誅貲於  
何有姑歸營出知錄錢於我乎取衆始定尋白守將

泉倡亂者十餘人州得無事後知邵  
武軍泚政簡嚴陞直秘閣轉外卒

吳樞

建陽人紹興間以進士令長汀每於耕斂之月聽  
因歸業約田事單來詣獄囚皆如期至剖曲直多

所原貸又以鹽綱事請於郡便民  
買食秩滿歸老稱涕泣遮留之

周堯卿

字子俞道州人紹興間以進士令寧化提刑楊  
紘入縣境見被械而耘者詢之道其故因曰令

不民欺民實欺令又何敢怨紘嘆而  
薦之累官太常博士范仲淹復薦之

卓庠

紹興間以長汀丞攝連城令時初立縣庠  
揆方宥勢悉自指授堡井塗徑條理秩然

丘欽若

紹興間連城令未期年鄰寇竊發欽若經  
畫地勢築城三百丈率民捍禦寇不入境

李弁

崇安人紹興間為連城令政務寬平有兄弟積訟  
者弁以理諭之感泣而去民為誦曰訟者息爭居

者安人李公為  
政百姓如春

劉國瑞

紹興間任連城令建  
學舍給官田以贍士

吳南老

隆興間知州事修學宮繕城壁倉廩會  
葛畬有逋寇南老縛其渠魁餘黨悉散

陳朝章

乾道中令上杭遷縣治於  
郭坊區處分畫俱有條理

黃藻

延平人乾道間為清流令縣有貼銀鈔錢素為民  
害藻聞於朝蠲免之值歲歉斗米半千躬行勸賑

多所全活鄰寇每相戒曰彼有善政慎毋  
犯之去任日老穉攀轅數日始得出境

程大昌

休寧人淳熙中守汀州境有寇亂戍將蕭統領  
兵戰死闕部大震移總制裴師武討之師武以

未得符不行大昌手書趣之曰事急矣如有責君者  
可持吾書自解時賊謀攻城先使謀者縱火為內應

會師武軍至得  
謀者賊遂散去

江瑞

淳熙中知州事先是州有銀冶歲代撫州建昌輸銀六千兩二郡歲償綿絹後值兵燹綿絹不生坑

場停開而所輸仍取於民  
疏陳其害得減三之二焉

祝棟

淳熙中以朝奉郎知汀州有獻羨餘緡錢六十貫名無額上供棟為減四分之一

黃樵仲

龍溪人登淳熙第調汀州錄事參軍有善績自書於屏云俸薄儉常足官卑清自尊

張振古

清江人淳熙中為長汀簿剛正有守郡帖下督諸鄉稅急振古乞寬期限不聽振古曰我不忍

奉上官以暴貧  
民即納印去

曾躍鱗

字士龍南恩州人警敏通經史淳熙中進士擢判汀州有政聲學士李彥穎少師陳俊卿尤罷



重之薦於朝  
拜監察御史

鮑粹然

字淳父龍泉人淳熙中令上杭邑文風固陋聘宿儒教導之士始知學邑多剽劫富豪為之寓

藏粹然窮愁之當事委決疑獄按閱得情無寃死者會州久旱父老白守請鮑令禱雨雨立至人呼為上

杭雨

趙克夫

紹熙元年知州事嘗買田於州學報貢院減長汀月斛米又奏省冗官常平藎多推虛數覆覈

至五千餘斛克夫取兩年州郡所積剩米補之

趙師璉

晉江人紹熙中進士判汀州時上杭尚寇結他尚為亂師璉廉其狀為擒渠魁郡賴以安

陳曄

長樂人慶元三年知州事歲撥郡帑緡錢二百貫興學又撥隸官田百畝為諸生廩餼減坊戶口食

鹽價以利小民置義塚以殯無所歸者汀俗尚鬼信巫寧化富民與祝史託五顯神為奸惑衆睽得其實窳祝史杖首事者毀其祠郡人吳雄作正俗論紀其事詳福州人物

### 上官損

邵武人慶元五年授武平簿叔養濟院以郵貧病及行旅之無依者有盜劫人誣隣人分贓損

一訊立剖人服其神調寧遠丞

### 陳映

粵弟嘉泰初繼粵出守循兄舊政捐間架錢以助學廩蠲積逋以寬屬縣葺兵營千餘間甃清流路

百四十里粵嘗創橋於南山高灘角上流至映方畢工邦人因以棠棣扁其橋焉

### 趙彥楠

嘉泰間監登聞鼓院時侂冑方柄政朝士悉趨其門彥楠獨不往侂冑聞而叩之出知汀州奸

民葉姓者嘯聚汀賴問彥楠至遣將除之

謝周卿

嘉泰間令長汀除諸鄉逃亡絕戶鹽撥田附州學以養士縣治社壇皆所興建

劉燾

建寧人嘉泰間由錄事調連城令罷添給錢及綱運例錢免上供銀錢及綱本二稅甲葉鈔鹽軍期

未等錢大修學校乞行經界著有集錄等書

陳鞞

侯官人初知南劍州提舉汀郡所部號忠勇軍時沙縣賊山間道趨城鞞率忠勇軍破之於高橋賊復攻汀州鞞再破之又巨寇晏頭陀嘯聚寧化鞞與主簿劉純擊破之諭降連城七十二巖頭陀伏誅汀

寇悉平詳福州人物

鄒非熊

嘉定元年知汀州三年被旨特留節制軍馬隄防鄰寇有賢聲

杜濬

黃巖人嘉定中由大理正知郡事省諸邑月解錢數十萬盡捐私貲代輸戶部以寬民力

傅康

泉州人嘉定中守汀州時戍卒驕不可使戍還愈肆康戮倡亂者四人餘皆股栗又叛萬桂莊以惠

赴舉者士

民德之

林岳

侯官人嘉定間以朝散大夫知州事叛書院二所日與郡士商確講肄汀郡及六縣學皆有祠

趙希館

字君錫嘉定二年授汀州司戶尚寇起州人震懼僉議守城希館言距城三十里有關曰古城

若悉布精銳以扼其衝賊不足慮矣守以付希館遂審形中令謹斥堠賊遣謀窺關希館故羸以誤之夜

半賊數百叩枚突至希館矢石俱下無一脫者餘黨聞風而遁詔陞本州推官

何鎬

邵武人與朱熹友善嘉定中調上杭丞時郡守有疾事多不理繁者或至累月大吏檄鎬佐之鎬取

文書旬日決遣皆盡又以田稅不均條說甚詳多所補助守滋不悅鎬即謝去著有易論語說

常楫

字濟川靖江人學該博為文瑰奇贈縵  
嘉定間令寧化剖決無滯民服神明

李華

建安人紹定間磔寇倡亂禁卒謹嗽華以安豐倅  
護淮軍來攝州事勦外寇平內叛事聞進三秩除

太府簿朱積寶之亂值歲飢華移粟給養全活甚衆  
尋除直華文閣仍削苗勦鹽價置均濟倉去之日邦

人建見思  
堂以祀

王杆

字元佐無為軍人紹定間判州事時郡將陳孝嚴  
引寇朱積寶兄弟為腹心仇視禁卒有黃寶者激

衆倡亂杆諭以禍福不從俄有欲殺孝嚴者杆叱之  
退孝嚴度失衆心因授郡篆於杆衆遂安後積寶亦  
叛屢犯州域杆指授方畧力禦  
却之民比屋祀杆曰王生佛

米巨宏

紹定間以寧化丞攝連城當寇亂後叛解宇修  
學宮給田養士定綱運額立賣鹽法還知連城

縣事

戴挺

嘉熙二年知州事卜學東射圃地建六齋以課多士去之日行李蕭然

孫鏊

錢塘人淳祐間任武平尉捕獲巨盜數十人謝賞不受

鍾紹安

興國人寶祐中以進士知上杭縣後從文天祥勤王

羅必元

進賢人進士有風節寶祐間判贛州疏劾賈似道謫知汀州

胡大初

寶祐間以朝散大夫知州事修郡學重建明倫致極堂御書稽古閣肇行鄉飲酒禮增儲均濟

倉錢米以廣賑糶廟禁寨舖兵並增給全分衣糧時聞射自給賞犒修城浚池屢平連城寧化劇寇

元

鄭從吉

長汀人勁直勇敢膽畧過人至正中上杭山寇竊發民兢入城自保延從吉捍禦從吉至與衆

約必盡殺賊乃已賊懼不敢犯境時田疇荒蕪流移過半從吉多方招集闕而治之屹然為一邑保障行

省知其能授以縣事

李實

字伯美汴人令武平時邑制草創學舍頽圯絃誦久輟實捐俸修葺加意作興事載學碑

明

朱仲恭

興國人洪武元年令清流邑當元季亂後仲恭招徠流亡勸課農桑修學校延名師以訓士政

卓然

劉雍

平陽人洪武間為連城令先是邑民不知種麥雍躬教之比歲大稔

秦斌 桂州人 洪武間以舉人任上杭令 縣僻在一隅 貨賄不集 斌為五顯會招徠 遠近商旅 百貨麇至 民

資利用

宋忠

崇陽人 洪武間知清流 興學勸農 剔奸釐蠹 羣盜嘯聚 忠抵巢諭降之 擢戶部郎尋守本郡

張光啓

南城人 永樂間任上杭令 有縣齋詩云 十年俸廩支難盡 一井廉泉飲不乾 強項枯荷撐雨立

貞姿古栢入雲端 讀具詩可恕其居官之際

梁瑤

化州人 永樂間進士 知寧化 不事苛刻 政修教立 後以憂去 百姓遮留 馬為不前

李庠

西安人 永樂間進士 知清流 縣燬於寇 庠至新縣 治建學宮 又為之均 差徑嚴課 士凡十五年終始

如一民至今思之



陸徵

華亭人正統間知郡事時衛卒强悍徵與通判吳瓊繩之以法莫不讐服

王得仁

新建人以掾任本州經歷秩滿軍民乞留二載擢推官正統十四年鄧茂七遣其黨陳正景圍

汀得仁急請郡守以賑避寇之民乘賊不意開門奮擊大破之郡守欲入山搜賊餘黨仁恐株連無辜力止之賊黨攻寧化仁復率兵往援遇於歸化之蓋洋又大敗之未幾卒

呂鏞

蘄水人由舉人令清流正統間鄧茂七寇縣境民咸逃竄鏞躬巡招撫盡力保障未幾賊衆二萬餘攻城鏞率民兵與賊衆寡不支為賊所執不屈賊支解之民建惠烈祠以祀

鄒

失其名正統間任鐵石巡檢沙寇至鄒力禦之被執與知縣呂鏞同死配享忠烈祠

王佐

新城人景泰中任連城令值鄧茂七掠境佐率民兵捍禦悉心竭力邑賴以全

李瓊

萬載人天順初以翰林檢討出知汀州時上杭寇發瓊親詣巢穴開陳利害皆釋甲解散秩滿卒於

官

丁泉

汶上人天順六年上杭寇發泉以指揮同知往禦之未幾賊勢復熾巡按伍驥奉命督勦泉奮勇先

登攻破石馬岐等寨猝與賊遇力戰死伍驥扶疾回朝亦卒邑人肖二像於城樓歲時致祭事聞賜額褒忠

張寧

字靖之海鹽人景泰五年進士授禮科給事中奉采甚著與岳正齊名成化中出知汀州先教後刑

境內利病悉罷行之後棄官歸公卿交薦不起

程熙

徽州人成化間以鄉薦領郡丞歸化紫雲臺有盜數千往來剽掠熙單騎抵營曉以國法皆解散去

胡鉞

嵯縣人成化初知上杭時初調千戶所守禦邑中悍兵驕卒肆虐於民鉞以法繩之軍民舉安

郭潤

零陵人成化七年令歸化時縣治新設人民雜附潤加意撫綏定戶口均賦役勸貸富戶以賑荒歛

興學造士雅重農桑自署其門云春雨有田宜蚤種公門無事莫頻來三載卒於官

吳文度

江寧人進士弘治間以南御史出守汀州訟者立庭下一言即服既得情輒矜貸虛懷禮士敬

老憐才時山寇出沒為患設方畧招致之境內以寧

程材

歙縣人弘治間進士授汀州推官嘗與巡按御史據法爭一囚御史怒曰我不知法耶材抗論不已

御史忽悟曰推官言是也幾誤殺一人矣舉廉卓授御史

王獻臣

吳縣人進士弘治中以御史謫上杭丞造文峯塔建社倉修橋路百廢俱舉

周纓

道州人弘治間令連城清謹寬仁撫字貧困文章講論為學者師正德初見權奸柄用嘆曰豈行道

時耶遂掛冠去

胥文相

巴陵人正德間守汀州郡東太平橋久廢民多病涉文相捐俸倡造民建利涉亭以祀之

謝溥

初門人正德間以鄉薦令長汀王守仁勦武平洞寇檄溥轉餉輸輓有功

蔣璣

平樂人正德初以鄉薦授連城令有治才鄰寇竊發預築土城七百餘丈以備捍禦後奉檄勦大帽

山賊猝遇寇於黃沙寨不  
屈而死贈汀州同知子廢

唐淳

字文厚臨桂人正德四年三省尚民騷動流寇蜂起寧化轉攻清流淳時同知汀州領民兵三千人

兼程趨縣賊望風遁勒兵西追  
絕其北戶以軍功陞本州守

陳袞

新城人舉人正德間擢汀郡丞方正自持不屈權貴

楊縉

貴溪人舉人正德八年令歸化時山寇竊發邑無城民逃窟山谷間縉請於大吏築城鑿池民賴以

安

王守仁

餘姚人正德間為虔州巡撫賊首詹師富等負嶠山洞守仁提師過汀往勦汀人感德所過皆

立祠  
祀之

余禕

鄱陽人正德間令清流建學宮裁冗費修橋道愛民如子九載晉建寧府丞

邵有道

都昌人進士嘉靖初為郡守築興梁四十餘座復城濠百餘丈定杭永糧米之爭在任四年五

見甘露之瑞  
郡稱大治

馬坤

通州人進士嘉靖初守汀有來訟者以片言折之讀書嘯咏意趣澹然榜於堂曰乾坤何事非吾事

堯舜之民即此民後歷官

戶工二部尚書加宮保

徐中行

字子與長興人嘉靖間知汀州廣寇蕭五擁萬衆來寇郭外男女爭避入城門者闔之有蹈藉

死者中行戒令速斥堠亟開闕身坐闕前引絙於途別男女以次入諸縣令各受教飭兵登陴賊不能破圍指押董玃壘繫男女數百中行以一旅解之盡奪其俘又策賊走且乏必由高吳道俾武平令徐甫宰伏兵邀擊破之擒其渠魁嗣念山寇出沒靡常而三圖多要衝議城之以通判控治得報可自是寇盜解

散歷官江

西右布政

黃震昌

遂安人舉人佐郡有忠政嘉靖四十年署永定平寇李占春有功鄉民避難城中流離失所震

昌捐賑全  
活甚衆

頤舜臣

字希仁上虞人進士以通判署清流令邑當兵燹後容戶口存亡定財賦虛實覈其重輕徵一

緩二民皆  
出危就安

郭子進

嘉靖間以鄉薦判郡事山賊溫祖突劫永平泰寧尤溪歸化四縣子進與永定令許文獻督兵

勦平  
之

張策

字獻可臨桂人嘉靖中以鄉貢令武平公餘輒聚士講授環鄉立社學造就英俊捐贖銀糴穀賑飢

開九層陂以灌田八隘樓以防禦在任四載窮鄉善惡悉知姓名當路交薦行取未赴部卒民思之

徐甫宰

字允平山陰人以舉人知武平時沿海諸郡連被倭患當事者多方徵斂轉輸軍民疲苦江廣

間巨獨大盜據險出掠民多從之甫宰至武平人誦  
之曰未有廉吏也而又拊我疾苦誘我禮義寬我追  
呼薄我笞楚矜我疑枉調停我微斂弛張我條格吾  
屬遂可耕以食誓相戒必無從江廣徒江廣徒出犯  
吾境吾屬共攻之於是勇悍者皆竭力殺賊歲獻功  
不下十數甫宰善綜理有才畧練兵勸賊鄰郡邑亦  
賴以安官終  
廣東僉事

常希仁

沛縣人嘉靖中尉武平勇畧過人時值寇發希  
仁挺身入討遂搗其穴又縣治山濬逼城為之

相勢修砌  
城賴以完

俞文朋

永豐人舉人令清流嘉靖間流賊窺城潛從東  
門龍津入縣將遇半橋人民驚走文朋挺身前

予禦之賊不敢  
進邑賴以全



顧輝 東莞人嘉靖中為夏陽巡檢未旬月流寇掠境輝統民兵禦之殺獲甚衆以兵少無援死之邑建義

勇祠與勇士陳珪陳鐸合祀馬

柴鑣

臨海人嘉靖中由舉人為永定丞時汀廣流寇逼境鑣選練鄉兵躬擐甲胄自花石嶺追至小尤圍

凡十餘戰寇黨殲馬更建邑庠於白馬山時聚諸生課督文學境內淫祠悉改為社學延名儒修邑乘百廢具興隆本府通判

劉文紹

安福人嘉靖間以舉人任永定令操守清嚴廣學舍築塘陂輕徭薄賦善政畢舉擒王滿賊平

李占春之亂在任六年解組歸民禁留遮泣

許文獻

長州人嘉靖間令永定永俗多以人命圖賴文獻痛抑之風遂絕山賊溫祖謀劫縣悉計擒之

邑賴  
以安

莫任

蒼梧人嘉靖間永定典史涖官勤勞以捕鄧大總力戰死

俞大猷

泉州衛人嘉靖甲辰由武進士守備武平簡閱卒伍教習戈戟著荆楚長劍法暇時會諸生講

藝校文擇俊授廩在鎮數年  
廣寇不敢犯境詳泉州名宦

張勳

福州右衛人守備汀州廣寇發獨當一面子守貴復守茲土有世澤碑

呼良朋

鎮東衛千戶守備汀州寇困平遠朋督所部解其圍繕城料兵武備整飭詳福州名宦

張鉉

高淳人由武進士守備汀州有儒將風練兵蒐乘有幹濟

梁以衡

新會人舉人嘉靖中知連城縣革里役供具聽訟常寬減歲造版籍里役有逃亡者招徠復業

旋乞  
歸

劉建

豐城人舉人嘉靖間任汀州司理時有絕好官人之謠寇亂後承檄使宜賑恤所活甚衆

黃弘綱

雩都人與何泰師事王守仁當時為之語曰浙有錢王江有何黃稱高第馬嘉靖間授汀州司

理御史沈寵凡遇閩中疑獄皆令讞之民稱無冤

萬廷言

南昌人嘉靖間進士由光祿丞謫汀司理治尚清簡減邊需嚴保甲立鄉校汀人德之

周徵

永康人嘉靖間為汀州照磨溪南人恣睢不法徵奉檄詣其地朝夕宣講鄉約諭於衆曰吾察爾衆

罔非良民其作非靖豈皆性異殆習使然吾將牖爾性更爾習惟爾省爾若於化良民也吾達於上爾撫爾非若於化即為大慈吾達於上爾勸衆聞之皆感泣行之三年民俗丕變

章宗寶

常熟人隆慶間令歸化質性清介人不敢干以私山寇犯境宗寶率僚屬多方守禦復捐俸築

四門月城  
民賴安全

曾可漁

吉安人舉人萬厯元年任汀州同知有曾青天之謠歷任九載一清如水陞知府民攀送流涕

陳善行

馬平人萬厯中以鄉薦為汀州丞嚴保甲修陂塘建波橋多惠政署寧化連城篆自携供具轄

車所至民  
歌春陽

熊茂松

高安人萬厯間任郡丞不為刻覈嚴峻兩署寧化篆新文廟造金山塔衙齋蕭澹恬如也尋

陞知  
府

萬振孫

合肥人萬厯間以進士守汀州加意學校建龍山學舍以課士學使按部振孫請加九邑科額

四十名捐俸增貢院號  
舍汀人士至今思之

黃應奎

錢塘人舉人萬厯間守汀州清嚴不避權勢增高城垣建東西二閣

饒景暘

南昌人萬厯間舉人厯守汀州清操明斷汀人有鐵耳冰心之頌

姚之蘭

桐城人進士萬厯間守汀州搜羨積五千緡抵遠餉清河稅戒溺女嚴錮婢民稱善政

金俸

杭州人萬厯間以鄉薦任汀州司理執法平反民稱不宥署寧化篆時丈量多溢額民以為憂俸定

為四則上下均  
勻填還原額

丘民貴

嘉興人萬厯間以鄉舉令長汀連邑有以浮糧飛泐累民者貴力請得免

唐世濟

烏程人萬厯間以進士領寧化令仁聲四徹公餘課士多所造就重建龍門橋廣濟橋往來利

涉民為構仁愛祠肖像  
祀馬歷官左都御史

楊萬春

錢塘人萬歷間舉人知上杭縣邑有疑獄三載不決萬春齋禱城隍具得本情人號神君

牛大緯

瓊州人萬歷間令連城民苦浮糧為累歲輸千餘金大緯力請得蠲其半捐俸賑荒民賴全活

去日治裝惟圖書數  
卷而已民立祠祀之

徐大化

會稽人進士由翰林御史謫知連城修學宮建南北二水閘築堡若邑苦浮糧前令得請蠲其

半大化竭力再請悉  
蠲之民免賦賠之苦

李待問

南海人進士萬歷間令連城舊有浮糧前令請蠲不報待問復力請始盡豁之時羣虎為患親

禱城隍驅  
之患始絕

丘大成

雋都人萬厯間令連城精形家術改學宮為  
舊向增廓明倫堂有政要堪輿諸書行世

洪都

青浦人進士萬厯間令歸化政平訟簡自題  
縣署曰民風僻壤原鄒魯史治青山但嘯歌

寇從化

靈寶人進士天啟間授汀州司理持大體有  
廉介聲嘗建龍江書院以課士文風丕振

蕭奕輔

南海人天啟間由進士令長汀時遼餉增派奕  
輔為通融代解徵收加平悉行蠲免以循卓聲

擢御  
史

吳南灝

武進人天啟間進士令上杭有禦侮才時潮寇  
作亂南灝募溪南驍勇為兵每寇掠武平輒率

兵督勦及寇逆城南  
灝奮擊之殺賊幾盡

沈鍾宿

吳江人舉人崇禎元年授汀州守建議合郡邑  
城為一以羨耗八百餘金儲築城磚石貯廣寇

竊發守弁有陷平民貪  
功者鍾宿力為解釋

笱繼良

鎮江人舉人崇禎三年守郡時當築城衆議未  
協繼良密請撤中贊垣拓南城六百餘丈又瓶

議設威遠營募兵措餉守圍以固又建王文成祠  
月集書生會講仍置田租供祭去後民肖像祀之

徐必登

福州右衛千戶崇禎元年武平寇發巡撫檄署  
守備夜半寇逼城飛書告急士無戰志必登拊

膺慷慨曰舍生報國此吾事也次日率弓兵千餘人  
入援遇寇於古樓崗前徒棄甲而遁必登單騎力戰  
陣歿於

陳正中

上海人崇禎間進士令上杭立節清苦時廣寇  
猖獗正中募兵儲餉親歷行間勦賊斷獄有神

明之號以勞瘁卒於  
官上杭民祠祀之



甘燿

潭州衛人崇禎初任汀州守備值寇發燿累月不解甲與士卒同甘苦所向克捷

薛應聘

會稽人舉人崇禎三年令長汀以道學自範有政績時值流寇募兵籌餉拓城築堡多所經營

陞充州

同知

唐世涵

烏程人崇禎八年以進士守汀州城垣卑薄世涵設法增築瓶甌寶珠門甕城移慈濟閣為戍

樓又捐俸建郡邑學造萬安濟

川二橋去之日民立祠祀之

唐錫蕃

無錫人崇禎辛未進士任汀州司理詞牘面決疑獄立剖市虎城狐法懲不貸署長汀連城二

篆革耗均役屢有仁政以艱去

國朝

趙廷標

錢塘人順治三年以選貢知永定縣時邑初附三罹漳廣巨寇兵食莫繼城守孱弱廷標推恩

義固人心調援他郡屢立戰功歷陞湖廣副使

于永綬

遠東人順治四年任汀州總兵官汀與贛州接壤值金聲桓據江西又土寇竊發環逼郡城四

路援絕永綬率副將高守貴堅守拒戰汀郡獲全未幾疾作正衣冠端坐而逝汀人畫像祀之

董鳳舞

東寧衛人順治六年知上杭縣時縣初定人戶流移田多未墾而援勅潮漳之兵往來絡繹供

需百出鳳舞隨宜措置以積勞卒於官

郭浩

寧陵人順治七年由舉人任汀州知府政清刑肅高風冷面人不敢干在任數年家居不能舉火

楊鶴齡

號三如錦州正紅旗人順治八年以生員知歸化縣事踏韜畧善騎射會山寇竊發鶴齡先士

卒冒矢石指麾防兵及客兵擊走之又捐貲以贖難婦瘞枯骨不愧古之遺愛調惠安民戴之一如歸化焉

**趙映乘**

字涵章祥符人進士順治七年由刑部郎擢漳南道在任二年以內艱去時劇寇張思選等負

險自固永定賊蘇榮朱以泰等復焚劫苦竹鄉勢不可制映乘曰吾輩受爵朝廷而今狂寇至此復何

面目對苦竹居民白骨也繪劫難圖三十冊上巡撫張學聖慷慨誓鄉勇偕遊擊賀國相直搗賊巢榮等

就擒思選亦竄死然後購買民居闢講議堂延師課士寇孽後至是始聞書聲

**楊宗昌**

號永菴趙州人已丑進士順治九年知武平縣事清介練達以人才初威洋選額隘申復武平

為中縣以內艱去官

文國禎

陽信縣人順治九年以舉人知上杭縣剛正不撓明於折獄民亦不忍欺尤勤考課士子經所

指授為文者皆斐然可觀尋以病卒

郁之章

字衷恒嘉善人進士順治十年以分巡道駐上杭時海寇入漳聲言來攻人情驚沸之章靜持

之密約城守張國棟整飭營伍趣通邑士民集演武亭手自草檄以忠義激發有眾眾願効死賊知有備宵遁去人謂之章寸管賢於萬鐵也上杭入學舊額視中學武平視小學今陟而廣之從之章之請也

方錫

江南繁昌人順治十二年以拔貢知清流縣事敏於治事時循行田野察民勤惰夜巡坊市酤酒作

非者必寘之法摘發奸隱身不憚勞六年擢沂州牧未任而卒

郭璜

字長松華州人舉人順治十五年調寧化令自奉刻苦每食一蔬一粥夜燃青燈而已己亥四月御

史按汀邑令劉餽千金瑣撫敝篋嘆曰此非利刀快  
斧解剝萬命何能供此天道神明民不可殘五月四  
日自經於官邸合城巷哭市為之罷不二日署中絕  
粒士民爭送薪米有黃氏婦餽銀五銖助喪痛哭不  
止或問之婦曰吾夫吳某世受里役之累賴公恩免  
公死累將及矣得不悲耶柩自汀歸送者衣冠如雪  
路人耕夫皆弛擔釋耒  
爭助扶舉哭聲震地

### 劉三章

字逸仙景州人順治十六年以進士由戶部郎  
擢漳南分巡道耿藩繼茂初駐閩府檄上杭民

夫千人至浦城聽候點用三章方抵省廉知民困力  
請督撫得免而杭民未之知也迨駐節官衙供億一  
槩禁絕凡訟牒獄案詳審覆閱多所平反所擬  
晴緩悉蠲之擢池太道副使去邑人立祠以祀

### 翁需

常熟人順治十六年以舉人知上杭縣性方行毅  
積弊悉除虛心獄決進兩造於庭諭以情理訟者

每釋爭而去

朱之焜

字岱瞻高郵州人壬辰進士順治十六年知武平寬待士庶嚴馭吏胥修城拓池皆捐俸為之

歲庚子廣寇謝上達等盤據五指石之焜指餉徵兵蕩平之錫功平寇碑

焦榮

號荆巖新野人順治十七年以進士知清流縣性剛斷治事嚴明以鋤奸除害為急嘗曰治亂民如

治絲斬之可也有勇畧能挽三百觔弓邑有小醜負岫榮遜胆勇蓄吏編為衛兵率而擊之賊遁去督撫

優獎歷任監察御史尋陞山西糧驛叅政

王章

號西三萊陽人進士以言事謫按察司照磨順治間署武平縣事撫民課士治簡刑清政事文學邑

人傳頌不朽

侯七乘

號仲輅汾西人戊戌進士康熙二年知武平縣廉靜慈祥寬徭恤民又喜講學課士周給貧生

清丈量冊修葺城池以憂去後擢廣信郡丞

黃易

海豐人順治乙亥進士康熙六年知歸化縣以廉靜稱十三年狀逆變起易棄官削髮間道從江賴

奔粵復遭粵變號哭與父母訣曰兒今為長往之人矣再奔江賴作行脚僧幽憤成疾會王師定閩從

江右請謁軍前當事特疏其事奉詔褒嘉未幾以病卒於福州詔贈按察司僉事遣官祭葬廕一子

監入

王之佐

號爽菴廣寧人鑲黃旗監生康熙十六年調寧化令時狀變初定海孽未殲徵求軍需日三四

至之佐酌劑權宜得減其半勦海之役漳師十萬日餉千斛上游飛輓以次遞漳寧化運夫五百人月一

踐更之佐念民疲役重力以減役上請語特酸痛督  
州憐而許之時有內員檢閱兵餉將入境之佐遠迎  
躬為導馬以縣署居之供具彌謹一宿即發引出境  
民間秋毫無擾會有黃機者國初擒賊之餘孽也  
乘甲寅逆廢以偽吳劉陰束諸鄉一鄉不聽脅從遂  
圍而屠之之佐請兵會勦值漳師逼海厚陣相持難  
以移師之佐情詞激切督府許調三鎮助之又值同  
安告急檄調二鎮援同安之佐乃斷割繫輪按止三  
帥曰長令當以官爭去留不忍示弱以驕賊致蕞爾  
糜爛飛書返檄聲淚俱落督府鑒其誠聽其調度遂  
部率鄉兵蹴賊壘而分攻之賊盡棄其衆越賴石入  
江西投誠江撫其納之發符護賊還寧使招集舊部  
以成一旅之佐堅不末檄昌言於大吏曰溥天王土  
非列國分疆之比閩賊即江賊也若閩賊入江便當  
宥死江賊入浙又應偷生王法將誰加乎如謂法外  
宥過以招不庭則自江納之即自江用之今名寄江



藉而身返閩巢閩之文武何顏臨之乎大吏魁其言  
遂猶其巢穴設防兵洞口斷賊歸路數十年逋誅擴  
族皆鳥獸散之佐戮力行間每領兵數千旦夕按行  
營壘聯客師為指臂市井肅若無人後以寒疾卒寧  
民震悼巷

哭三日

王國脉

字均公蒲州人康熙十八年知歸化縣事洞悉  
利病知無不為甫下車廉飭法奸胥置之法每

聽訟虛公下詢平反至再先是逆藩及海島鄭氏構  
亂十室九空鄉民聯甲保聚丙辰逆平多擁衆逋課  
國脉嚴團練之禁申逋課之誅未幾納課者累累國  
脉曰吾固謂頑民皆良民也又念負險而抗課多由  
併徵長民者不責十排而專責現役所致於是申上  
憲分徵各甲民大稱便嘗捐貲重建文廟購學田  
修城樓倡積穀修葺焚燬城隍贖回掠賣  
婦女所費動盈千百歸化人至今誦思之

鄔翼明

遼陽人順治乙未進士康熙二十年以禮部郎出知汀州賦性仁慈聽斷詞訟片言立決固圓

為之空虛時文廟傾圮翼明率僚屬暨紳士捐俸鼎新之

徐開遠

崑山人康熙二十年以舉人授汀州推官居官廉潔扶弱鋤強不為威怵時靖藩旗兵橫行矣

嚇開遠執法不阿藩丁股慄汀人以寧

王廷掄

澤州人康熙三十四年由戶部郎中出知汀州時郡城遇荒廷掄開倉賑濟復購米石於東西

開設立粥廠民賴以活又興東西兩河水道浚郡河壅塞創建豐橋汀人利之

張昇

字明疇福安人具先世居福清之龍田康熙三十七年任永定訓導督課士子崇實行黜浮華賢聲

大振遣羅源教諭兵燹後賞宮鞠為茂草并捐貲修葺文廟兩廡齊舍煥然一新後以艱去再補永春

雍正元年擢湖  
廣安陸知縣

### 福寧府

### 五代

許光大

周時為福寧沿海都巡檢江寇至硯江光大持  
短兵與戰謂鄉人曰勝則江水清敗則江水赤

既歿於陣江水如血者三  
日屍隨潮歸州人廟祀焉

### 宋

蔡高

字君山仙遊人景祐進士尉長溪邑有媪二子漁  
於海而亡媪以警家告令不為理高察媪色有冤

乃出宿海上期以十日必得屍七日海水潮二屍至  
驗之皆殺也遂捕讐家伏法有夫婦偕出而盜殺其

守舍子者高五召里人卑會熟視之指一人曰此殺  
人者訊之果服嘗病宋時六科策士學者多以記問  
應對為務乃晝夜攻苦力學有遺藁十餘萬言後為  
太康主簿卒於官高端明殿學士襄之弟歐陽修銘  
墓其

黃琮

字子方莆田人進士元符中尉長溪戡吏便民以  
憂去邑令鳩諸屬錢以贖固辭不受徒步護喪歸

曹輔

字載德沙縣人進士元符中尉寧德建憇亭於白  
鶴嶺後歷秘書省正字諫徽宗微行遭貶詳延平

人物

宋棐

字材成莆田人進士宣和元年令寧德時政久弛  
凡輸送率歸吏手羣不逞持文書叫囂里中至百

輩真偽不辨棐力革諸弊後  
官至禮部侍郎教文閣待制

儲惇叙

字彥倫晉江人進士宣和四年為寧德令清慎自持政多惠愛後奉祠里居屋不增一椽田不

遺一

潘中

字民極浦城人崇寧五年進士靖康元年令長溪會建辛葉儂叛中團練民兵為備寧德告急中持

兵夜赴冒險以戰被執遇害尸僵立  
不仆事聞贈朝請大夫官其二子

趙詵之

字宗盛建炎初以奉議郎令寧德焚膏聽斷獄無冤抑吏不能欺歲飢勸賑民賴以濟邑有羣

不逞為民害者嚴禁戢之乃謀為亂詵之  
廉得其情設方畧捕誅首惡境內以安

陸游

字務觀山陰人以蔭補登仕郎紹興間為寧德簿有善政後以寶章閣待制致仕著有詩文集百卷

世行

劉曄

乾道間寧德教諭時廟學久廢曄易民地表其前而拓之執事掄材從吏課功門廡煥然改觀

趙善悉

字壽卿宋宗室淳熙二年知寧德建文廟橋星門又造金溪石橋免民徒涉人稱趙公橋以

治行擢嘉禾太守

盧應時

字泰夫泉州人淳熙七年寧德主簿裁決疑獄人服其神時有爭牛者令不能決以屬簿挾奸

者知不能欺不讞而服政事文學俱卓卓有聲

姚東

字明仲尤溪人進士慶元中調長溪簿適大旱東禱即雨民呼為主簿雨令丞廨被災獨簿廨存人

以為誠心所格

趙時煥

字元晦晉江人宋宗室嘉定中以進士調長溪尉政聲大著奸惡望風遠竄

劉鎮

字方叔樂清人嘉定中任長溪王十朋薦之疏云  
屢更州縣皆有治績明敏之政吏不能欺民立祠

之祀

鮑遜

字克順平陽人淳祐進士初令長溪剖斷獄訟邑  
無寃民帥幕欲增軍期船額遜為民爭之以此被

譴士民挽留者千餘人每夜設天燈為  
禱復刊其善政訴於朝後起為司農丞

黃恪

字叔謹南劍人淳祐二年長溪令初赤岸營田陂  
屢築屢壞督漕叅政王伯大委恪督役恪捐俸截

溪流駢木為基構巨石砌為三級  
以壯陂勢灌田千餘畝至今利之

鄭黼

字文甫崇安人淳祐五年析長溪西北置福安縣  
時黼為令經畫里居設施政令井井有條民不知

勞

李澤民

淳祐八年為長溪令新  
湖學築東湖士民德之

徐夢發

浦城人進士淳祐間令寧德時學校廢弛首加  
修葺增祀先賢以勵後學居官平恕日以忠孝

教其士民後官廣東招  
捕使元兵南下死之

元

胡璉

懷孟人至大間任福安簿持身廉謹以德化民  
遷建湖學創薛補闕祠造溪口諸橋民懷之

蒙古台

回回人皇慶中福安尹以廉潔正大律身以孝  
弟忠信導民敬老愛士務農重穀善政歷歷可

紀

高琛

燕山人至順間福安尹剛毅正直表孝弟興  
學校鋤強植善厚本抑末去後邑人思之



張巴延

字正卿吳門人至順初知福寧州時州學養膳無田巴延為置田育士至今祀之

王巴延

字伯敬霑化人至正九年以朝列大夫守福寧有異政陞本省轉運副使會紅巾警報至州民

環馬首泣留巴延招募訓練團結鄉勇分兵壘四門自率中子相引兵擊賊於楊梅嶺敗之巴賊大集還保州治賊突入城巴延奮力與戰馬蹶被執賊曰公廉能素著吾屈公仍尹此州巴延曰吾奉命守州義當殺賊有死而已寧殺我勿殺吾民賊又強之跪巴延曰此膝可斷不可屈也嚼舌血唾賊大罵遂遇害神色不變立而受刃頸涌白液如乳體僵不仆數日面色如生民無老稚晝夜聚哭忽有毒蜂數萬集賊庭賊亦時時驚駭見巴延引兵入州境賊酋皆無疾自斃中子相亦被執死之相妻滿閉口絕粒與二幼女皆死有僧林德成者起兵討賊忽空中四面皆青衣官軍時賊方祀神以為賊首來助戰迎之無有也

德成望空呼曰王州尹率陰兵助我賊大敗盡殲之  
福寧平事聞贈嘉議大夫濟南路總管上輕車都尉  
進封太原郡侯行部御史余闕立廟祀之長子楨  
襲父爵除紹興路總管張士誠陷郡亦不屈而死

張賢贊

至正中判官十三年三月  
紅巾陷州治賢贊死之

明

朱政

字文正望江人洪武初知寧德有為有守凡  
署舍臺司皆拓而新之德惠深入民心久懷

龍存仁

字淑心湖廣人洪武中知福寧縣修廢  
墜恤孤寡興學校理冤獄民愛戴之

關可誠

歸善人洪武間由監察御史調寧德令愛民禮  
士守已奉公修廟學獎勸生徒推廣東僉事

尹昌隆

字彥謙太和人來應天鄉試第一會試第二進  
士及第由編修改御史直言忤執政出知福寧

縣清勤自勵科差必驗丁產而高下之吏無所售其奸公暇名諸生講課尋復原官

張鐸

字振文清江人進士宣德初以御史督寧德銀課在縣數載崇學校禮師儒構觀濶亭建御書樓廟

學祭罷煥然一新

張鵬

字騰霄西安人宣德間以御史監寶豐場先是每歲四進場課大為民病鵬奏減其二民得以甦

林約仲

名組以字行平陽人宣德間寧德教諭時學官傾圮約仲白有司修葺齋築室數百極擇子

弟俊秀者俾就學明經義以正其術嚴條約以要其成士風大振

蔡智

字尚鑑黃巖人宣德間寧德訓導篤行勤學於書無所不究在官立教條嚴考課隨才質而程督之

多所成就教諭周汝嘉歿遺孤且裨智捐俸歸其喪後以憂去

焦玉

字溫夫汶上人福寧衛右所副千戶宣德五年海賊寇境玉從都指揮劉海收捕分兵至小管洋山

中與賊遇奮戰力竭死之

項智

字伯仁西安人正統初知福寧縣性溫而厲修學校均徭役百廢具興有爭訟者每令退省發其天

良獄訟以息

竺淵

奉化人正統二年坑徒流劫鄉村淵以叅議守劉洋為坑徒李龍所害事聞封鎮山護國侯祠祀之

顏清

字汝陽廣東人正統中任寧德丞時銀場雜辦院司府屬監課軍戍往來文書絡繹清應接如流會

鄧茂七叛焚掠村間清率民兵克其寨邑獲安全後卒於銀場貧無以殯百姓哀助之

胡晨

字克興英山人正統末福安縣丞時鄧茂七倡亂愚民乘機嘯掠晨備禦有方民賴以安景泰初歲

飢廩竭晨立券稱貸於富家不足乃盡借留倉米賑之同官欲候申請晨曰須得報動經旬日民死過半矣有罪晨獨當之遂開倉賑給全活者衆

陳醇 桐廬人景泰六年以舉人知壽寧時邑新設庶務草創醇隨事經理井井有條山谷椎魯之民始就

教化

劉象 字有儀安福人成化九年縣復為州以象知州事勤政惠民百廢俱舉後大旱禱雨以疾卒嘗於龍

首山植松四萬餘株鬱然成林民比之甘棠云

郭祥鵬 太和人進士成化間知州事歲歉賑濟有方多所全活歷官叅政本州候補潮亭有記

吳廷珙 浮梁人成化間叅議時福寧諸路凶荒廷珙設法賑濟生養死奠民咸賴之

胡富

字永年績溪人成化間僉事閱福寧獄訊遣淹抑四百餘人後歷官尚書謚康忠

趙璉

字宗商成化間福安丞時大風傷稼繼以水患民大飢璉不待請以倉儲餘糧量口給食又勸富民

出粟以濟不足民賴全活歌之曰有桑足我  
蚕有田足我農衣食誰與我縣丞趙相公

劉順

字惟理成化間知福安先是有盜藏金者誣及藏卒順至疑之廉得其情陰遣人詣盜金者家以水

灌地果得金  
藏卒獲免

鄭鑑

字貴之慈谿人舉人成化末知寧德持身清謹泚政廉明抑強植善吏畏民懷尤重學校培養士氣

去後人  
思之

閔鷄

字廷舉浮梁人舉人弘治間學正嚴於教士士多成就署州篆雪郭氏及他死罪百餘人民為之語

曰化雨已沾羣弟子春風  
更被幾寃人著有困齋集

**江瑢**

字玉輝金谿人弘治間寧德簿持身清介涖民有威尤留意學校建講堂搆學舍以居生徒官索蕭

然至無以為歸計嘗應詔陳言  
皆切時政多見施行人稱賢簿

**吳廷瑄**

揭陽人弘治間知壽寧以清白聞邑舊無城廷瑄始築之民恃以安遷知養利州

**萬廷彩**

字文明武寧人舉人正德五年知州事門無私謁時逆瑾黨藉端需索廷彩力拒之為政精勤

釐革奸弊窮鄉  
民隱無不周知

**李縉**

字廷儀豐城人舉人正德辛巳以興化同知攝州事明決精敏獄無滯囚不事鞭扑豪猾懾服又請

留解福州餘  
銀民力以紓

歐陽嵩

字汝中太和人進士正德九年知福寧州首開東南河一千八百丈澗田數千頃復買田建河

資倉貯稅為後疏濬之費

于震

字孔安餘姚人正德中知福安邑遭火患震為文禱城隍且諭民曰鳳池之設以防火也火不得水

故為患耳乃汲其淤塞澗水不竭民賴焉尤長於詩所著有易傳東溪集

王鑿

字節之浮梁人舉人正德九年寧德教諭嘗攝縣篆禁海舶貨稅之弊當事交章薦之

龔穎

字栗夫吉水人舉人正德九年令寧德恤貧弱抑豪強禁火葬黜浮屠佛事俗為之化

劉璫

字德成安仁人正德間知福安視民如子待士如賓平易簡默諍愬不行為政三年未嘗有怒色

尹衮

永新人正德間以舉人知壽寧政尚德化一介不取嘗鑿陂築堤溉蕪田數千頃歲飢設法賑濟後



丁艱扶柩歸民  
賻之悉不受

李詔

字應魁南豐人正德十三年寧德丞明敏勤事嘗捐資建尊經閣名宦祠設趙公渡亭歸休十年猶

兩馳資修葺  
人益難之

李長

字復之縉雲人進士正德十四年以給事中建言謫判福寧嚴明廉介人不敢干以私署福安民多

訟受其勸諭者咸願退息州人梅八虎武斷鄉曲長峻法繩之豪猾屏跡時有神明之稱

汪均

字仲弘休寧人嘉靖間按察司僉事分部福寧倭猝起議徵海上兵備福寧均以寇舟順風而來所

至皆戰地徒備福寧無益乃移戍沿海要害時寇逼同安有罪囚陳嘉任等七人黥勇可將均出諸獄賜洗沐諭以討賊贖死咸感泣願為先鋒於是大出兵邀賊擒殺百餘賊遁去事聞七人咸貸死民立祠祀

之

金淞

字松澗東陽人甲辰進士嘉靖間以叅議守福寧嚴毅英斷自奉清約長於治兵先為漳南巡道撫

軍徵餉八郡淞獨持不與曰閩顧急倭獨不慮大帽山寇乎欲疏聞同僚勸止餉遂寢

陳泗

永康人嘉靖間知福安摘奸鋤強每食只薯一器人呼為薯公

趙廷松

字子俊樂清人進士嘉靖中以刑部主事議大禮謫州同知聽斷如神罰贖悉以修築衢路拓

洋流賊劫掠鄉村廷松領軍追捕賊皆遠竄長於古學及去以所攜書籍散頒多士後官至山西左布政

繆冕

字希周汾水人嘉靖七年福安訓導以道學自勵擬師聖賢克己私戒嗜慾務謙勤四詩梓授諸生

學使者督以舉惡冕曰古人謂他郡自有平原自無冕不敢罔人以自免竟受罰士論賢之

閔文振

浮梁人嘉靖十二年寧德訓導持身嚴謹雅志作人菟求先儒遺書凡學校當舉之事為之不

遺餘

力

謝廷舉

彬州人舉人嘉靖十四年知州事十八年詔開州礦百觔僅得銀二錢不償所費錦衣千戶李

隆請益其數廷舉拒之得罷採又派銀三千餘兩供三山驛費廷舉力爭不得欲草疏以聞直指乃減其

半去日民如失父母

項喬

字暹之永嘉人進士以兵部主事謫州同知下車公宴日革里役所供門吏宴賞錢令罷宴攜所刻

牧民條約舉業詳說頒示士民明年擢去歷官廣東叅政

許士經

南海人舉人嘉靖間州學正待士有恩禮輯楊時以來至朱熹門人刻曰道南觀感錄又刻梭

山家訓士論  
翕然稱之

孫勳

號次薇南海人舉人嘉靖二十六年知州事時海上軍書狎至新命都御史治兵自浙入闈供帳不

如意欲庭撻州官勳頽謂行杖者曰撻我必重始快其忿不然汝死杖下矣百姓感泣日擁其輿以行初

都御史至民且皇皇比出境間無毫髮擾者

夏寶

號來山南城人嘉靖三十一年知寧德一僕自隨布袍蔬食聽訟立剖累無留贖銀金悉入公帑政

暇則吟詩灌園  
擢常州通判

鍾一元

號侍山秀水人進士嘉靖三十三年知州事時鹽商專利病民一元力制之使不得縱復歐陽

守舊河以資田州治西無城乃營築西城計六百餘丈甫竣而倭至民德之像祀焉

張璧

福寧衛指揮僉事嘉靖三十三年任烽火寨把總倭犯大金等處璧禦之俘馘有功三十八年倭數

萬寇巖前衆欲并之避璧曰吾世受國恩有死而已遂戰死

謝君錫

海陽人嘉靖三十五年福安訓導時倭至錫守小西門拒之流矢貫面猶強忍不退城陷趨歸

學朝服拜先師北向拜闕南向拜親觸柱死

劉灼

字光大寧波衛指揮使嘉靖三十五年福清被倭官兵屢屐灼夜襲倭營倭由古田寧德望海遁去

灼持兵趨捷徑於寧德石壁嶺要賊比至嶺隘部曲散亂僅家兵數人願懷印者曰為我保此吾死之矣即奮身持鉄鈹揮殺三賊力盡無援死之所揮鉄鈹尚堅執不墜寧德人祠之於石壁嶺

程箕

字斗南績溪人嘉靖間福安教諭嚴立教條學政一新倭入寇箕督兵力戰外援不至城陷遇害

柴應賓

鄞縣人舉人嘉靖三十七年知州事時以倭警橫派里甲應賓至一潞前樊漳軍人林子信竊

趙氏嬰兒手鐲趙迨究子信推其子於池反誣之應賓立白趙枉州城塚久圯應賓刻期砌塚甫竣而倭

至城賴以守卒於官民哀之

章文粹

涇縣人嘉靖間州訓導學問淵邃講貫詩經要旨大有發明值有倭警郡守柴應賓病屬文粹

守城綜畫有法避難者皆使得入未幾卒於官

劉邦采

安福人嘗受業於王守仁當秋試以棘闈故事脫中跣足非待士禮謝不往於是御史儲良材

令諸生俱着常衣入場遂舉於鄉嘉靖間任壽寧教諭與諸生講論思若造微能以片言聞人夙銅學者

稱思泉

先生

盧仲佃

字汝田東陽人嘉靖三十八年知福安時縣城初陷於倭積骸彌野仲佃招集人民急築城壕

次年倭又至携其三子與民固守賊不得犯後擢刑曹

李堯卿

號太華番禺人舉人嘉靖三十九年知寧德政平訟簡民安其業值倭寇萬衆來攻孤城自守

外援不至城陷死之事開贈太僕丞春秋祀馬

林時芳

號我峯湖陽人舉人嘉靖四十二年知寧德當倭賊陷城之後招撫瘡瘵築城禦濠改易縣治

創分司建廟學在邑四年日不遑食夜無安寢民賴以甦

胡經

鎮東衛經歷兩署寧德篆妻織布僕採薪里甲亮無所費前後積紙贖薪炭銀三百兩錦緞四疋咸

籍庫曰此皆民膏也豈可取哉

李紀

號月渠泗州人進士隆慶改元以叅議駐福寧州建籌策樓留意學校禮賢愛民擢去士民擁送之

陸萬垓

字天溥平湖人進士隆慶二年知州事剖決如流兵興增賦力為節縮歲省金六千有奇容兵

更戍創兵營於城外處之編省圖里折併州縣大得民心鹽價湧貴捕治奸民以通鹽法暇則進諸生講

學談文至今稱善政者必曰陸公

李瑄

字邦和豐城人萬厯間按察司僉事駐福寧州秉性端嚴閩清令不職火緣為奸瑄寘諸法以劾閣

臣王錫爵削籍

崔師訓

號弘臺太平人進士萬厯間以叅政分守福寧州寬和忠愛體卹民瘼自奉節愷不以寸絲粒

粟擾民每聽訟勸諭諄諄不施鞭朴勤思防海冒暑巡歷以勞卒於官州人哀而祀之



劉介齡

號鶴臺南海人進士萬厯元年知州事時議增遊兵欲於正米外加徵兵餉介齡嘆曰民力竭

矣鄰郡有驛傳之費吾州嘗助之今吾州有師旅之役盍還我驛傳為兵餉乎事遂寢

王棟

江陵人萬厯初知壽寧嘗捐俸贖民地鑿泮池復立義倉勸諭士民出粟實之以備不虞

韓紹

號懷愚歸善人進士萬厯二年知寧德為政精勤釐革蠹弊門無私謁里甲不煩請除陷海虛糧免

站銀七百餘兩及去士民遮道泣留官至太僕卿

祝永壽

號望坪臨川人舉人萬厯八年知州事精明寬厚禮士愛民州城向皆荒石傾欹可踰永壽請

易以甃遂成堅壘河燭奸弊吏民畏服

錢士鼇

號石卷錢塘人進士萬厯二十二年知州事吏治精明兩造具片言立斷待理者晨往夕歸闕

關山陬夫征無擾暇日遊覽山川名勝隨筆題咏卒於官百姓為之罷市遂櫬日哀送百里立祠以祀

戴鏜

建昌人萬厯間知壽寧修築關隘創建社倉綜衆得體

霍騰蛟

南海人萬厯間知壽寧署建安甌寧建陽三縣所至有聲順昌妖人吳建鼓衆謀亂巡撫檄延

建二府往撫衆相顧失色騰蛟獨請行單騎入壘諭以禍福賊中有欲加害者建曰寧殺我毋殺仁父母也護之還既而賊相誅戮官軍乘勢殲之屍蔽山谷騰蛟嘆曰皆吾赤子今聽吾言何遽至此捐貲買山之瘞

洪翼聖

歙縣人進士萬厯二十七年知州事涖政勤慎不尚名法嘗捐置學田以贍單寒

方孔炤

號仁植桐城人進士萬厯四十八年知州事始至建學宮開玉帶池監中天坊立敬一亭復龍

光塔甫二年以員外郎遷去  
士民建祠立石名曰思樂亭

**梁鵬**

順德人進士以刑部主事謫福建鹽運司知事萬  
厯間攝福安令捐資以助諸生之無冠服者貧婦

夜作給以燈燭每飯食無兼味  
有私餽者戒而遣之廉介可風

**方可正**

遂安人天啓間知壽寧首尚文治創延賓館集  
諸生問難有吏盜帑金立抵於法宦族奪民妻

斷還之夏秋稅糧聽民自交凡調知松溪以  
疾辭歸所著有易經講義學者稱直完先生

**馮夢龍**

吳縣人崇禎七年知壽寧政簡刑清崇尚文學  
待士有禮所著有四書指月春秋指月智囊補

等書為  
世傳誦

**凌義渠**

號茗柯歸安人乙丑進士崇禎間為禮科給事  
中與時相溫體仁不合體仁語冢宰以義渠吏

事明敏優於治劇宜以監司用遂出為福寧叅政精勤夔別一塵不染吏民戴之後以大廷尉殉甲申之難

巫三祝

龍門人進士崇禎間知州事愛民恤士嘗築水壩建書院後擢戶部主事

揭重熙

字祝萬臨川人五經進士崇禎十三年知州事以清廉明敏稱日與諸生講學論文夜分無倦

色後重熙於桐木關就俘繫建寧獄門人孝廉陳士道貢生朱國龍隨入獄賦詩慷慨獄卒聞者皆泣下後與重熙俱斬於建南街其從者鄧貴戴鳳亦殉於側

徐丙晉

字載九松江人進士崇禎間知州事性敏決兩造煩瑣數言立剖以廉潔稱民監功德坊及祠

之祀

國朝

陸懷玉

順治初福寧道飭紀釐網察家式化清核額賦吏胥不敢為奸頒行大學衍義及小學傳註陶

淑多士閩人思之

郭之秀

潘陽人順治三年知福安縣鼎革初寇盜四起之秀招撫有方邑人劉中藻以故國遺臣聚

兵拒命焚掠城邑之秀與戰為流天所中死

吳允燁

字弘文仁和人順治三年由貢士隨征福建有功授建寧府壽寧縣知縣四年山寇四起乃招

集義勇身先禦寇以衆寡不敵被執腦箍懸樹體無完膚罵不絕口而死妻瞿氏常勸允燁盡忠勸寇勿以身家為念聞夫被害投繯死蒙恩卹贈廕一子垣

欽定四庫全書

卷三十二

饒崇秩

豐城人順治六年知壽寧時值寇攘秩領大兵冒天石復孤城所俘賊黨脅從罔治全活萬

餘人鋤強輯衆調度有方諸凡創建次第畢舉歷五載擢廣東德慶知州

李之蕃

長州人順治十年以舉人知壽寧承草創後規模雖立治具未張之蕃下車即捐資建縣治以

壯觀瞻招撫餘盜解散羣黨境肅清大兵入閩羽檄旁午供應裕如後以事解任去邑人立祠以祀

張延統

號嶽蓮華州人順治十一年以舉人任福安縣未匝歲人仰其惠旋聞父訃號慟七日而絕士

民酥錢以殮并歸其喪馬

周文華

進士康熙初知州事值播遷之際訓士愛民修葺學宮城垣百廢俱舉方報遷而卒

師佐

號靖公永寧人順治壬辰進士康熙二年知州事時當播遷招集流亡嚴禁差擾民若虎患為文驅

之虎遠去遷蘇州  
丞民立祠以祀

吳萬福

遼東人康熙間任福寧總兵官在鎮日寇賊屏  
息逆狀難作萬福發兵拒戰死之全家被害事

開贈太子少保子卹廕康  
熙三十五年祀九忠祠

王一彪

平陽鎮把總康熙十七年赴援福建桐山營奮  
勇進勦歸至竹堡嶺遇賊血戰死事聞子卹廕

官其子  
第一人

臺灣府

國朝

姚啓聖

號愛菴浙江紹興人康熙癸卯以漢軍籍登賢  
書第一初任香山知縣以誑誤去朝廷知其

欽定四庫全書

卷三十二

有幹濟才起為甌東郡佐尋陞溫處道十五年隨和碩康親王入闕為福建布政使時耿逆初平海氛未靖啟聖每自備衣糧招募壯勇有澄清海外之志常曰國家聲教無外今逆藩雖已削平而以臺灣一彈丸厯宵旰使沿海居民不遑寧處罪將誰歸會總督卽廷相去任擢啟聖代之於是得為所欲為而平臺之計決矣十八年移駐漳州漳與臺通間謀可施乃大開招來館使隨征叅議道黃性震董其事賊降者無真偽皆納之高宴華軒焜煌於道令福州同知蘇良嗣督造戰船委隨征同知林昇糧運用人揆務洞中機宜既數月賊稍有降者即厚賞賜以褒嘉之聞者心動先是平陽總鎮朱天貴向自海外來歸啟聖知其驍勇熟海道諳賊形勢特疏請天貴叅軍事至則引入帳中相與卧起器用供帳侈於自奉天貴感激竭誠致命得其死力遂增置火炮軍器買上游米石以圖大舉會蘇良嗣戰船亦適報竣乃



夜馳三百里至閩安鎮之五虎門親自配舟調遣操  
演水師隨又赴漳使興化知府卞永譽泉州知府張  
仲舉往說賊降而偽行人傳為霖雖約為內應實心  
持兩端及為霖見殺乃作急據狀從數騎招搖城市  
見大屋輒扁之榜其門曰某鎮公館某將軍行臺各  
盛陳供具得賊偵則佯曰若非某將軍人手歸語而  
主某日之期不可與予酒食遣之歸得他偵亦如之  
海上喧傳自相猜忌繼踵納款鄭氏心腹皆人人自  
危矣十九年二月癸未啓聖乘賊懈遣兵攻破陳洲  
馬洲觀音山石碼等十九寨甲申復遣隨征遊擊張  
定國都司張壘等引兵直抵海澄城下計招偽總兵  
蘇侃為內應攻拔之降其衆二千二百六十七人遂  
復海澄是夜遣隨征知縣黃金從等乘潮分渡直入  
海門等處降其偽統領鄭元堂偽都督黃瑞偽將軍  
陳珍偽鎮張雄偽將軍張治等水陸兵一萬二千八  
百八十一人丁亥遂復金門廈門賊勢窮蹙退保澎

湖二十年啓聖以北人乘舟終非素習軍中帥不可  
無人具疏上請天子以內大臣伯施琅為靖海將  
軍既至與之籌兵料敵經畫方畧於二十二年六月  
乙酉從平海進兵癸巳克澎湖七月丙申逆藩鄭克  
塽率衆歸誠海外悉平啓聖督閩數戰前後議勦臺  
灣獨握勝算一切文移條教悉出已手雖溽暑酷寒  
不倦每有議論指授英氣激發義形於色遇有功將  
弁及降將皆開誠獎勵捐金宴犒無少吝惜推功讓  
能勞謙不伐為定  
謀推轂名臣第一

施琅

號琢公晉江人漢軍籍初任同安總兵屢建奇功  
陞福建水師提督削平金廈沿海諸島康熙六年

以邊患宜靖疏請勦臺灣奉旨赴京而奏尋以議  
裁浙閩粵三省水師提督留京晉爵內大臣伯康熙

二十年朝廷從閩督姚啟聖請特命琅征臺琅  
至閩選練舟師操演三載以二十二年六月乙酉由

銅山起兵八八單直抵澎湖澎湖為臺門戶賊之精銳  
悉在焉有衆二萬餘人艘二百餘號集於難籠等與  
偽鎮國公劉國軒亦擁精兵二萬屯於風櫃尾牛心  
灣等處環設砲城以陸兵守之其餘沿海賊舟星羅  
碁布琅令大小船於風帆上大書坐將姓名以知進  
退定賞罰丁亥昧爽鼓角喧天兩師將合琅先令曾  
成藍理吳啓爵張勝許英阮欽為趙邦試等七艘衝  
鋒破浪直入賊師焚殺過當值南潮正發前鋒為急  
流分散賊艘復合齊攻琅知其深入自將坐船衝殺  
賊艘救出收泊八單獨駕小舟潛偵賊寨動靜癸巳  
與各鎮誓師分為八隊每隊七舟各三其壘琅自統  
一隊居中調度留八十餘舟為後援又分遣五十餘  
舟從東畔蔣內截寇歸路以五十舟從西畔牛心灣  
內外並為疑兵牽制忽北風驟發相逆三軍股栗琅  
巡師大呼曰無畏惟天惟皇帝之靈實式臨之  
須臾雷震風反將士賈勇而前賊舟大發火矢交攻

烟燭迷天官兵乘勢夾擊自辰至申賊艘被焚覆溺  
投水者無算劉國軒遁入小舟從吼門出僅以身脫  
既破澎湖琅思以恩信結臺人凡降偽鎮營弁獎賞  
有差給士卒糧米焚傷覆溺未死者醫藥救治之有  
欲歸見妻子者給舟送之降卒相謂曰是真生死而  
肉骨也歸相傳迷賊衆解體望王師如時雨方駐  
師澎湖時士卒數萬缺淡水隨地鑿井甘泉湧出於  
是軍聲大振逆藩鄭克塽始決計歸順遣裨將馮錫  
珪陳夢煒齎獻延平王金印一招討大將軍金印一  
公侯伯將軍銀印五前來乞降時七月二十七日也  
八月壬子琅統舟師臨臺地受降令偽藩將卒人民  
土番削髮官民有讐怨者悉為捐釋撫殘孽籍府庫  
兵杖卹陣亡將卒及臺地兵民之殺傷者雞犬不驚  
壺漿載道琅乃具奏准其降附詔如所請差侍衛  
吳啓爵齎勅到臺赦偽文武官准投誠安插內地  
加授琅為靖海將軍封靖海侯子世襲提書到闕

上解所御龍袍馳賜載褒以詩琅復念海外初平所  
在土番雜處為善後計特疏陳臺灣棄留利害周詳  
懇切請設守分郡縣以為東南數省藩籬 詔報可  
版圖式廓海波不揚江浙閩粵四省數十年鯨鯢久  
靖魚鹽物產輻輳  
內地琅之功為多

朱天貴

莆田人平陽鎮總兵官康熙二十一年以總督  
姚啓聖薦奉 旨調回閩省協勦臺灣二十二

年六月二十二日攻克澎湖天貴率舟師奮勇追擊  
斬獲溺死者無算會中砲死姚啓聖上其功 詔贈  
太子少保謚忠壯廕一子知州時會勦臺灣有功者  
興化總兵吳英海壇總兵林賢金門總兵陳龍銅山  
總兵陳昌廈門總兵楊嘉瑞副將蔣懋勛林葵詹六  
奇叅將羅士珍遊擊林瀚王朝俊許毅張勝何應元  
曾成功吳輝趙邦試二等  
侍衛吳啓爵筆帖式常在

蔣毓英

字集公奉天錦州人由官生知泉州府康熙十二年臺灣歸命督撫會疏交薦調知臺灣始

至見井里蕭條哀鴻未復躬歷郊原披荆棘經界三縣封域相土定賦罷不急之役安撫土番招集流亡訪詢疾苦進父老子弟教以孝弟之義振興文教捐俸創立義學延師課督任滿遷湖廣鹽驛道士民重簡詣大中丞告留會江右觀察使缺特旨調補百姓立碑紀績於所建書院塑像祀之

沈朝聘

遼東人初任晉江縣遷四川茂州知州康熙二十三年以才能移知臺灣縣為人方平廉介不可干以私初抵任不費民間供應催科撫字調劑得宜治姦吏莠民法不少貸以憂去民投櫃資其行立

碑志遺  
愛馬

靳治揚

隸黃旗人由筆帖式歷漳州知府康熙三十四年知臺灣府抵任蕩滌草竊招撫土番捐貲修

文廟詳免崩陷田課尤雅意作人番童有未  
知禮義者立社學延師教之臺人請祀名宦

李中素

字鵠山楚黃之西陵人以湘鄉教諭卓異擢知  
閩縣催科不擾治行著聞薦調臺灣善聽斷

遇有冤獄必竭力申救至頑梗不馴者一繩以法不  
少貸嘗攝郡學篆教諸生諄諄以孝悌為先長於詩  
歌旁及字畫自成一家以  
勤職卒於官臺人思之

衛台揆

號南村山西曲沃人由廕生知漳州府康熙四  
十年以廉能調知臺灣府每月延諸生分席講

藝親定甲乙多士奮興四十四年歲饑詳請題免本  
年租課性廉靜不事煩苛三年之內民安衽席秩滿  
陞廣東鹽法  
道以病乞歸

陳瓊

號眉川廣東海康人康熙甲戌進士四十一年由  
古田調知臺灣縣商艘來臺窮民苦於水丁詳請

豁免修葺文廟建明倫堂不時考課文風丕振歲  
稔設法賑貸發倉平糶旱則去蓋步行甘霖立至會  
水漲消隄勢逼倉厥躬親土石士民無不爭先甲申  
內召補銓曹士民籲留格於例不果至今誕日臺人  
猶張燈鼓樂以祝  
為海疆治行第一

王敏政

字九經正黃旗人由監察御史外轉興泉道康熙  
四十年移節臺灣仁厚不苛事悉就理尤

加惠番民凡通事社商有賸削者嚴禁之番車之有  
濫派者懲創之遇歲荒歉申請賑恤民賴生全秩滿  
陞廣東雷瓊道尋以  
病卒民建祠祀之

孫元衡

字湘南江南桐城人由貢生知四川漢州知州  
康熙四十二年遷臺灣府同知性溫厚於物無

忤而秉骨剛正不屈權勢諸不便民者悉除之會歲  
旱令商船悉以運米多者重其賞否則有罰於是南



北艘雲集臺民得飽而歌數攝諸縣篆  
署府符所在有善政秩滿遷東昌知府

周元文

字洛書正黃旗人康熙四十六年由延平知府  
調補臺灣方正廉潔僉壬畏若神明置義學田

以贍寒士歲荒詳免租課十之三一切  
指注悉本實心臺民至今猶思其德

洪一棟

字石臣應山縣人康熙四十八年由監生同知  
臺灣府革除水口積弊以利商人豁除逃亡丁

賦值荒早多方設法運  
米以活饑者臺民欣感

施世驃

琅子任水師提督駐廈門康熙六十年朱一貴  
倡亂世驃聞變集諸將議曰臺寇猖獗六七日

全郡俱陷此非小敵也今臺灣數百艘逃入內地脫  
有奸徒混跡乘虛鼓煽屢島一搖勢不可制各將誰  
執乃按兵觀釁而總督覺羅滿保羽檄飛促世驃出  
師赴澎湖以慰衆心迨滿保至廈門而世標已登舟

出港兩日矣抵澎湖與南灣鎮總兵藍廷珍商克復安平計時朱一貴悲衆攻安平世驃與廷珍遣將分攻直搗臺郡朱一貴等後先就擒世驃即於軍中疏平臺郡狀值南風正駛捷書至闕賜世驃東珠朝帽蟒袍異數有加時元兇雖擒餘黨散匿世驃復與廷珍分遣大兵廓清南北二路以除殘孽會風雨大作屋瓦皆飛人民震蕩世驃與廷珍終夜露立疾作卒於軍

藍廷珍

南灣總兵官康熙六十年臺寇朱一貴倡亂總督覺羅滿保飛檄召赴廈門商畧機務廷珍以

海外豕突殘魂必重臣坐鎮以安人心消反側乃遣人陳請滿保駐廈門就近督師滿保得所指陳喜曰藍總兵所見事與吾脗合吾無憂矣遂自會城兼程疾趨至廈而廷珍亦單騎率所部舟師繼至滿保令總統征臺水陸大軍赴澎湖會提督施世驃進勦六月朔出廈門港二日至青水溝時颶風驟起軍士

相顧失色廷珍親自操舟馭風漂至銅山風定由銅山至澎湖世驃大喜與議進兵廷珍慷慨言曰羣盜烏合一攻即靡但其衆至三十萬不可勝誅以某所見止殲渠魁餘令自新且安反側乃戒將弁無得妄殺翼日進兵廷珍親率諸將奮擊賊衆敗走克復安平賊復率二萬衆列牛車夾牌盾為陣蠶擁蟻附復攻安平廷珍督大砲四面環擊賊大潰退保府治越數日廷珍督大兵南下復敗賊衆追殺至嵩松溪一貴遁去遂復府治駐萬壽亭提督世驃屯北較場分遣大兵廓清南北二路以除殘孽一貴暨餘黨先後俘至臺

郡悉平

歐陽凱

漳浦人臺灣鎮總兵官康熙六十年四月臺寇朱一貴倡亂監旗於南路岡山凱撥官兵前勦

賊勢猖獗二十八日凱領衆駐春牛埔戰連日五月朔賊黨數萬雲集凱奮身血戰躍馬衝突賊四面圍

攻勢窮力困中鎗墜馬賊刃交下截其首去事聞  
詔贈太子少保子邨 賜祭葬廕子第一人 以守備  
用

許雲

海澄人臺灣營水師副將康熙六十年四月臺寇  
竊發雲率師赴援鎮軍與賊戰於春牛埔冒矢石

為士卒倡刃賊無數復衝陣掩殺至中營埔賊衆奔  
潰次日賊悉衆數萬四面來攻雲躍馬陷陣賊不敢  
逼乃擁衆至春牛埔圍總兵歐陽凱雲分遣遊擊游  
崇功督兵往救凱陣亡雲孤軍無繼仍呼勞將卒鼓  
勇血戰連殺數十人往來衝突自朝至日中矢窮砲  
盡重創過體墜馬步行猶手刃數十賊左臂折乃罵  
曰吾生不能盡殺汝等死必來殲滅汝賊怒寸磔之  
事聞 詔贈給拜他拉布勒哈番世職子邨 賜祭  
葬廕子第一人 以守備用

羅萬倉

陝西人臺灣北路叅將朱一貴之亂總兵歐陽凱戰死府治失陷萬倉鼓勵將士堅守賊攻北

路連發大砲擊之仆賊旗賊四面蝟集萬倉突圍拒戰兵孤無援踰溝墜馬賊以竹篙裁其喉猶揮刀殺賊而死妾蔣氏聞兵敗亦自經事聞 詔贈給拖沙拉哈番世襲子卹 賜祭葬蔣氏第一人以守備用

妾蔣氏 詔建坊旌之

孫文元

雲南人臺灣鎮左營遊擊臺寇朱一貴竊發歐陽凱等戰歿賊攻府治文元兵少勢孤於鹿耳

門內望北叩首 畢躍入海死

游崇功

漳浦人臺灣水師左營遊擊康熙六十年領水師哨巡北路洋臺寇之亂崇功奉調援勦同副

將許雲併力擊敗賊衆聞鎮營圍急率兵赴春牛埔而總鎮歐陽凱已陣歿崇功手持大刀左右衝突殺

賊三十餘人中鎗墜馬死事聞與遊擊孫文元俱  
詔贈給拖沙拉哈番子卹賜祭葬各廕子弟一人

以守  
備用

胡忠義

陝西人臺灣鎮標左營守備臺寇之亂隨歐陽  
凱率師於春牛埔拒敵忠義衝鋒力戰中砲墜

死馬

馬定國

陝西人臺灣鎮南路營守備朱一貴亂攻南路  
營定國督兵拒守賊勢猖獗定國奮力血戰勢

不能支大呼曰我朝廷命官豈可遭擒取辱遂拔  
佩刀自刎死事聞與胡忠義俱詔予卹賜祭葬

廕一子以  
衛千總用

蔣子龍

閩縣人臺灣鎮標中營千總臺寇倡亂隨總鎮  
歐陽凱拒敵春牛埔大破賊衆次日賊勢復張

子龍奮身疾戰被  
賊刃斷一臂而死

陳元

侯官人臺灣鎮標左營千總臺寇朱一貴倡亂元率師同本標右營遊擊周應龍於南路岡山禦賊奮力掩擊賊敗走明日直進赤山又明日賊悉衆四面圍攻元與鏖戰數陣受創被獲逼降不屈死

趙奇奉

廣東人臺灣水師協標右營千總臺寇環攻南路奇奉隨協鎮許雲率水師援勦連敗賊衆次日賊悉衆攻春牛埔奇奉力戰死

林文煌

侯官人臺灣水師協標千總臺寇作亂文煌隨協鎮許雲率兵援鎮軍連日力戰於山川臺文煌衝鋒殺賊歿於陣其弟文甲從師亦死馬事聞與千總蔣子龍陳元趙奇奉俱

一子以衛  
千總用

詔予恤 賜祭奠廕

李茂吉

漳浦人臺灣水師協標中營把總臺寇之亂茂吉自請為前鋒隨副將許雲率兵援鎮軍力戰

於春牛埔為賊所執不屈勅之降茂吉瞑目厲聲曰我朝廷職官豈肯降汝草賊耶舉足翻其几案奪

賊刀殺賊賊共斫之頭破裂罵不絕口而死

林彥

閩縣人臺灣鎮標中營把總臺寇之亂隨總鎮勦賊於春牛埔賊悉眾來攻彥爭先臨陣死之

林富

長汀人臺灣鎮南路營把總臺匪竊發奉委率兵為遊擊周應龍前隊引路至赤山與賊戰賊稍却

富乘勝深入賊厚陣圍之攢刺而死時有削賊把總江先達鎮標右營領旗王奇生俱力戰歿於陣

石琳

永定人汀州鎮標中營把總康熙六十年春差領汀鎮兵至臺灣換營適遇臺變琳力請助戰為賊

所圍歿於陣事聞與把總李茂吉林彥林富俱詔予卹賜祭廕一子以衛千總用



陳大輦

江夏人字子京康熙丙戌進士初知粵西永安州遷福建監運分司釐剔賑政奉委清丈閩田

平允得民歲辛丑臺匪作亂大輦督造平底小舢飛渡臺港多所裨助尋擢分巡臺廈道至則安輯流亡撫綏部落土番歸化者接踵會餘孽跳梁未靖大輦悉捕獲正法臺民始獲衽席之安滋任三年以疾卒

永春州

宋

陳靖

莆田人開寶中任德化尉參議軍事有平賊功後再知泉州詳興化人物

江公望

字民表睦州人進士紹興初知永春為政明於大體未數月百度畢舉不勞而集

林廷彥

字朝美莆田人紹興間授永春縣尉當官俸祿不入私室時草寇猖獗代者畏難不至廷彥獨

歷四考百  
姓安堵

黃瑀

字德藻閩縣人紹興中知永春時因寇亂凋瘵之餘首蠲宿負有業去賦存者悉釐正之輸賦後期

揭姓名於市不使吏胥捕擾凡  
所聽斷摘發如神詳福州人物

陳琪

字子重仙遊人嘉定間進士知永春值汀寇焚蕩後悉心民瘼初朝旨蠲租州縣皆以窘迫弗克奉

行琪獨撙節月會杜苞苴之費積錢  
八千緡以補貸民還兩浙管運卒

元

錢宗顯

大德中為永春主簿時上司檄輸箭竹一節十  
握者三萬五千官吏沿例催督地非其產民甚

苦之宗顯毅然曰害若不除去有遺恨力請  
除畿邑民歡聲動地立碑紀之後陞本縣尹

盧琦

字希韓，忠安人。進士。授永春縣尹。初至任，歲饑，發倉賑貸，罷橫征，禁游民不事生業者，大得民心。仙

遊寇發，遇琦於塗，望風羅拜曰：「此永春大夫也。」有君如此，誰忍負之？吾為縣官所苦，故至此耳。琦諭以禍福，皆棄刃投槊而散。調寧德縣，寇聞琦至，即遁去。時黃中倡亂，應者如響，咸相戒勿犯。盧使君境有海寇，執一漁者，詰其所居，知與琦隣，飲食而遣之。詳泉州人物。

明

王巽

洪武元年，知德化縣。時當兵革後，公私凋敝，巽至修葺學宮，縣署建壇，遺慨然，以興舉廢墜為任。三

年間，政平俗化，人謂其得安靜畫一之體。

馮翼

德平人。洪武間，知德化縣。先是邑以抽軍，故民盡逃，移死絕者過半。田荒而糧額仍懸，百姓賠累不

堪翼至廉其詳歎曰瘡痍不瘳何以施梁肉哉即以狀奏聞詔蠲其稅額至今民受其惠

古彥輝

廣東長樂人洪武間任德化縣主簿性敏決精於吏事能識大體盡心為民不尚苛察擢監察

御史

應履祥

奉化人洪武末知德化縣居官廉謹平恕時邑文運未開履祥勸獎士類邑之人士登科第者

始多歷官按察使

李青

石城人天順間知德化縣為政平恕公餘嘗巡行郊野有不勤農事者召而諭之朔望入學宮講論

終日無惰容洫任九年士修民勸秩滿去士民丐留三年

任順

常熟人正德間知德化縣縣有曾鵬兒好告訐素為民患順至以德化之不悛乃置之法惻然遣之

曰爾何不為嘉禾而為稂莠乎自是德教蒸被狴獄空虛

**鄧景武**

德安人嘉靖間知德化縣縣舊無城比年寇警羣結寨於縣後大龍黃龍二山景武至為度地

營城正南臨溪東自龍潯山麓以上環山而北西包大洋山而下達於溪雄視列邑未幾呂尚四倡亂後

令張大綱憑城為固賴以破賊

**柴鑣**

字仲和臨海人嘉靖間由舉人知永春始至官即進父老詢疾苦邑之轉輸永寧軍者請改輕折價

會汀廣流寇逼境鑣選練鄉兵躬擐甲胄自花石嶺追至小尤中團凡十餘戰賊黨殲焉又改建邑庠於

白馬

山

**呂嶽**

興國人嘉靖間任永春訓導土賊謝愛夫等瞰邑城初完兵少糧乏率倭屯留灣嶽捐俸犒衆以死

拒守密遣人約諸寨救應  
因出精兵殺賊遂解圍去

唐文傑

桂林人嘉靖間知大田慈祥愷悌與民  
休息以不附權要謫去百姓遮道泣留

謝廷訓

會稽人嘉靖間知大田留心政務果於興革邑  
為驛道所經例有夫役當者輒破產廷訓請於

當事曰民病未蘇重困以役是驅之盜也乃  
免作新編以諭民造稽契冊版籍井然不紊

李偕

上高人嘉靖間舉人知大田下車捕盜為亂者嚴  
治堡壘以威鎮之歷任三載俸資外分毫不侵陞

太僕寺丞去日民攜金  
帛為贈和顏慰辭之

周堪廢

字仲聲寧鄉人天啓間進士知永春縣宿弊盡  
革訟庭晏如邑有十詞九免供之誣以賢能委

署忠安忠之人歌曰安得兩周公忠永俱蒙  
休嘗力請增科額二十四人有作人之功

姚遵

秀水人崇禎間舉人知德化縣時泉宜勢熾泉屯之在德化者屯丁悉允勢宜收取民不堪命繪圖

叩闕事下按驗進力為民部折寃狀反覆數四痛哭流涕當道感動上其事歲省額外橫索萬餘金

金麗澤

字石可武進人崇禎間拔貢知德化縣精神炯炯顧盼凜然片言洞人肺腑擢漳州同知明亡

之死

國朝

潘際昌

仁和人隨征入閩順治三年知永春縣鼎革初土寇蜂起為亂嘯聚攻城際昌率民兵登陴

守禦百餘日外援不至力竭城陷投井死

胡萬鑑

仁和人順治三年以貢考授通判隨征入閩授永春州學司訓上寇薄城萬鑑率諸生募民兵

登陴捍禦百餘日食盡城陷被執罵賊不屈死之

胡天湛

井研人順治三年知大田縣時盜賊猖獗所在焚掠天湛調撥鄉兵悉心防禦城孤援絕力困

不支至四年十月初八日城陷被擒不屈而死

王寵受

寧晉人進士順治八年知德化縣時兵燹之餘流離未定城邑邱墟寵受力撫凋敝詢疾苦會

土寇充斥聯絡山砦親為訓練鄉勇捐俸犒士悉力禦之嘗舉行鄉飲酒禮遠近翕然十年以憂去

崔越

字秋濟平度人順治十二年以歲貢授德化縣時征勦海寇微檄紛馳每詣郡計畫事辦費省大

兵克復泉郡巨寇歸順嘗於通衢私抽貨稅越力捕買之法十四年復叛遂督鄉兵禦之以勞成疾卒於

官道路聞之皆為流涕



劉繼祐

涇陽人順治十二年以進士知大田縣邑當初定井里蕭條繼祐撫以廉靜訟獄不繁賦役征

輸井井有法奸胥

莫能上下其手

和鹽鼎

字巖夫城固縣人順治丙戌舉人康熙六年知德化縣痛革弊政嘗與紳士參酌利病比聽斷

必反覆辨論務得實情不肯輕置之法擢大理寺評事去

王之紀

涪陽人由筆帖式隨征入閩康熙十六年委知德化縣狀逆初平泉邸新復瘡疾未起之紀簡

靜鎮撫不事紛更平訟獄省興作民甚便之擢行人司行人去之日士民攀轅泣留

龍巖州

宋

傅知柔

仙遊人宣和中登第調循州推官以破賊功擢知龍巖時虔寇橫行聞其威名卒不敢犯

吳珏

興化人淳熙特科嘉泰中知龍巖御僚議增諸邑轉輸珏力爭罷之詔造戰艦下縣取材拒以非例

病民辭不獲乃足其直以市不以擾民擢判漳州未行而卒

楊中立

字南強晉江人嘉泰間知龍巖縣有惠政嘗捐俸築南隄民賴之

林介卿

晉江人嘉泰中知龍巖縣邑在萬山中巨寇出沒城郭未完乃修西砦募兵儲穀教弓弩謹斥

堠寇不敢犯又錫朱熹諭俗榜以化民旌孝節復死事後卒民哀思之

元

黃佐才

至元間為龍巖尉適李志甫作亂陳君用襲之佐才併力助戰奮不顧家妻子四十餘人俱被

害賊平贈  
龍巖尹

明

周尚文

香山洪武進士授龍巖丞州城戶有鐵課六萬餘劬苦於遠運尚文中准折鈔民便之

李昊

字用寬巴陵人天順初以舉人知龍巖男女有愆期者助其婚嫁逋稅不能完者佐之輸納生徒賢

者加優禮馬秩滿部  
使上績詔書旌異

韋濟

海陽人成化初知龍巖拓舊土城修學廟遷社稷壇立養濟院修龍津虎渡二橋會汀寇發鄰境皆

受害巖  
邑獨全

陳粟

南昌人成化間以舉人知漳平時縣初立民械悍難治粟創縣治建學校編徭役五年以艱去

陳熙

慈谿人弘治進士知龍巖文章政事多足稱述部使行縣見縣事皆理一宿即去擢監察御史

湯相

歸善人嘉靖中由舉人知龍巖均地租商稅以補浮糧築新圳以溉民田修城外堤百八十餘丈以

捍水患  
民德之

劉鑄

宣城人嘉靖間為漳平令清查威惠廟租幹理有條刊立惠民公田以杜侵隱之弊在任九載清勤

一如

魏文瑞

桂林人嘉靖間以舉人令漳平歲大旱給粥賑飢全活甚衆時值流寇攻縣力為保障後奉檄

會勦賊首楊一蘇阿普等以援兵不至遇害士民痛哭事聞贈光祿少卿立祠賜祭廕一子

董良佐

玉山人嘉靖末以舉人知寧洋時邑城郭官室未備良佐與教諭利漉歷山躋嶺採取木石營

造學宮公署教民行鄉約  
士民漸化陞鬱林知州

鄧于蕃

南海人萬厯初自古田調知寧洋始遷文廟  
廣學宮建燕樓又甃石夾渠以列屨市文田平

賦流徙  
復業

鄧藩錫

金壇人崇禎甲戌進士知龍巖性侃直不畏強  
禦時土寇張維新等劫掠鄉村藩錫設法誘獲

置之法盜  
風始息

國朝

戴真學

浙江人順治三年隨大師入漳知漳平邑在  
萬山中寇四起真學且撫且禦寇不能犯五年

賊王鎬等擁眾萬餘逼城下六月城潰時方夜半真  
學出巡城見勢不支急奔入署手刃其妻出為賊所

獲剖心而死教諭  
劉泰陽同日溺死

張奇

盧泗

顧雍

俱漳平防將順治五年永春楊為  
勦率賊數萬人攻城屯於後葛逼

脅各寨堡助餉奇等攻其  
營伏兵驟發三人並遇害

王有容

字自牧麻城人順治九年投龍巖縣時方軍興  
徵夫取餉羽書旁午有容多方為民請命乘便

增城浚濠儲糧置械十一年寇再至漳郡失守孤城  
無援有容乞師於賴與民瀝血死守明年春寇薄巖  
城有容調兵據勝屢挫其鋒賊解去城  
賴以全又修學宮廣育人才尋陞去

蕭亮

四川人順治十二年以博士弟子員隨征入閩知  
寧洋時寇盜充斥邑里荒殘亮威信並行勦撫互

用復招集流亡修城郭  
百廢俱舉民立祠祀之

張豐玉

字麟符莆田人康熙元年以鄉薦署寧洋教諭課士悉遵六經而詞氣以左史為宗間以其餘

旁及詩賦字義人以為有蘇湖之風

杜雲禎

字緝一永年人康熙三年以舉人知龍巖案無留贖胥役不得售其奸時海澄公標兵一營就

巖月給兵米九百石有奇雲禎力為請命減三之一忠聲噴噴人口建碑以誌

陳運泰

正白旗監生康熙十六年知寧洋時平海大帥轄集百費浩繁運泰請豁軍需免力役民賴

以蘇明年山寇猖獗蜂擁攻城親率家丁鄉壯擊走之

王時泰

新鄉人康熙甲辰進士十八年知寧洋自甲寅變後城邑邱墟時泰招徠慰諭凡有徵派力陳

豁免民得安輯陞中書舍人民思之

左峴

字襄南鄞縣人康熙庚戌進士十九年知龍巖時海氛未靖賦役浩繁羽檄星馳峴鎮以澹定民得

安堵政簡訟息有古循吏風又捐俸修學宮課士先為文式文風一變尋陞威州知州

江藻

字魚依漢陽人康熙二十四年以拔貢知龍巖邑承狀逆變後民苦追吁藻善撫之亦無逋賦者五

年編審哀多益寡務得其宜巖俗健訟藻不置差拘設立木皂隨至判決他郡嘯聚者多望風投欸又捐俸新文廟建新羅書院創雲景橋士民德之

福建通志卷三十二